

**1:1** I mulana, sinderrang madèng ihanaken dunia èn, enggo kin ngo lot kata i. Rebbak dekket Dèbata ngo kata i, janah Dèbata ngo kata idi. **2** I mulana nai ngo Ia rebbak dekket Dèbata. **3** Merkitè kata i ngo ihanaken Dèbata sagumanna silot. Oda lot barang kadè pè hana, ukum mak merkitè-kitè Ia. **4** Kata i ngo memmerrèken kenggelluhen, janah kenggelluhen i ngo merrèken sendang taba jelma. **5** Merbinendang ngo cuhaya i mi bagasen sigellap, janah oda terènteppen sigellap i cuhaya i. **6** Ipasulak Dèbata ngo utusenna magahken terrèngèt cuhaya i taba jelma. Si Johanes ngo gerar utusen i. **7** Roh ngo ia memmagahken sukuten i mendahi karina jelma, asa percaya kalak i taba cuhaya i. **8** Oda ngo ia dèng penendang i; ai roh pè ia pellin lako memmagahken terrèngèt penendang idi ngo. **9** Penendang i ngo cuhaya situhunna, cuhaya siroh mi dunia èn lako menerrangi karina jelma. **10** Enggo i dunia èn kata idi. Tukasi pè merkitè kata idi ngo itempa Dèbata dunia ènda, tapi oda itandai dunia èn ia. **11** Roh ngo ia mi nagerriNa sendiri, tapi oda ijalo bangsaNa i Ia. **12** Tapi lot ma ngo barang piga-piga kalak menjaloSa, janah percaya baNa. Bai kalak idi mo iberrèken kuasa asa gabè dukak-dukak Dèbata, **13** sinitubuhkan oda bai jelma nai, kerna nggelluh rimbaru idi bai Dèbata nai ngo rohna. **14** Enggo gabè jelma kata idi janah merrian i tengah-tengahta. Enggo siidah kesangapenNa imo kesangapen nijaloNa bagè Anak sada-sada ni Dèbata. Ai merkitè Ia ngo ipeterar Dèbata dirina dekket ngkelleng atèNa banta. **15** Si Johanes ngo mengindangkanSa, ai nina ngo, "Èn mo kalakna sikudokken i roh i podingku nai; tapi belgahen ngo Ia asa aku, ai enggo kin ngo lot Ia sinderrang madèng tubuh aku." **16** Ngkelleng kalohoon ngo atèna banta, jadi dakdak ipasu-pasu ngo kita. **17** Merkitè si Musa ngo iberrèken Dèbata pati-patiin banta, tapi merkitè Jesus Kristus, ipetarar Dèbata ngo dirina dekket kelleng atèna banta. **18** Isè poda nung mengidah Dèbata, laènken anakNa sada-sada i sidos dekket Dèbata, sirebbak dekket Bapa i, Ia ngo petararken Dèbata Bapa banta. **19** Ipasulak pengulu-pengulu Jahudi mo imam-imam dekket dèba marga Lewi i Jerusalem nai, mendahi si Johanes janah mengkusoken tabasa, "isè ngo ko situhunna?" **20** Oda ngo irusiaken si Johanes, ntompel ngo idokken, "Oda ngo Aku Raja

Sipaluah niperbagah-bagah Dèbata." **21** "Mula bagidi, isè ngo kono?" nina kalak idi mengkusoi. "Mada ngo kono si Elias?" "Oda," nina si Johanes. "Mada ngo kono Nabi idi?" nina kalak i dèng ma. "Oda," nina mengaloi.

**22** "Mula bagidi, bagahken mo bai nami, isè ngo kono," nina kalak idi, "Asa kubettoh kami magahken taba sipasulakken kami. Bakunè pendokkenmu terrèngèt dirimu?" **23** "Ukum aku," nina si Johanes, "Imo bagè nidokken Nabi Jesaya, 'Sora sitenggo-tenggo i kelongoon. Peddèas kènè mo dalan bai Tuhan i!' " **24** Ukum kalak simengkusoi idi imo sinipasulak kalak Parisè. **25** Nai nina kalak idi mo taba si Johanes, "Mula oda ngo kono Raja Sipaluah niperbagah-bagah Dèbata, oda si Elias, oda ma Nabi idi kasa perridiken jelma kono?" **26** Ialoi si Johanes mo, "Laè ngo kuperridiken bai jelma i. Tapi enggo i tengah-tengah ndènè sada kalak siso nitandaan ndènè. **27** Roh ngo Ia janah enggo i podingku, tapi mengosari èkèt cipatuNa pè oda sanggup dèng aku." **28** I Betania ngo masa i karina, kan kebincaren Laè Jordan bekkas si Johanes perridiken jelma i. **29** Sibarembenkenna, idah si Johanes mo roh Jesus mendahisa. Idokken si Johanes mo, "Tengen kènè mo! Adoi mo biri-biri Dèbata mahan pèlènken i, asa sasa dosa dunia èn! **30** Ia ngo sikudokken i siroh i podingku nai, tapi belgahen ngo Ia asa aku; ai enggo kin ngono lot Ia, madèng kin pè tubuh aku. **31** Oda ngo kutandai dèng kin Ia, tapi roh aku perridiken bangsa Israel merkitè laè asa itandai kalak i Ia." **32** Bagèen ngo pengindangkan si Johanes terrèngèt Ia, "Kuidah ngo Tendi Dèbata susur i langit nai bagè ndarapati, senggep janah merrian baNa. **33** Sinderrangna i oda kutandai dèng kin Ia; tapi Dèbata sipasulakken aku perridiken merkitè laè, mendokken bangku: 'Barang mendahi isè idah kono susur tendi Dèbata janah merrian bana, Ia mo roh perridiken jelma merkitè Tendi Dèbata!' **34** Tuhu-tuhu ngo enggo kuidah idi," nina si Johanes, "Asa, tuhu ngo Ia Anak Dèbata; percaya mo kènè!" **35** Sibarembenkenna nola, cènder nola ma mo i bekkas idi si Johanes dekket dua kalak sisinna. **36** Idah kessa mo Jesus memellus arap idi, nina mo, "Tengen kènè mo! Adoi mo biri-biri Dèbata!" **37** Idengkoh sisiin si Johanes sidua kalak idi ngo nidokkenna i, nai mèter ièkutken kalak idi mo Jesus. **38** Tumulih mo Jesus mi podi, nai idah mo kalak i mengèkutkenSa, gabè idokken Jesus mo, "Isè ngo nitulusen

ndènè?" Ialoi kalak idi mo, "Rabi, i dikè ngo kono merian?" (Rabi lapatenna 'Guru'). **39** "Roh mo kènè, asa idah kènè," nina Jesus. Nai ièkutken kalak idi mo Jesus, rebbak mo kalak i sidarinkenna i. Kira-kira pukkul empat ciboon mo i. **40** Sada ibas kalak idi sidua i nai sienggo mendengkoh kadè sinidokken si Johanes janah laus nola mengèkutken Jesus, imo si Andreas, anggi si Simon Petrus. **41** Nai ndor mo itulasi si Andreas si Simon kakana i, nina mo mbangsa, "Enggo jumpa kami Mesias i, Raja Sipaluah niperbagah-bagah Dèbata!" (Mesias lapatenna Kristus kata Junani.) **42** Nai ibabai si Andreas mo si Simon mendahi Jesus. Idah Jesus kessa mo si Simon, nina mo, "Si Simon ngo kono, anak si Jona. Si Kepas mo kono mi podinkenna èn." (Kepas kata Heber dos ngo i dekket Petrus kata Junani, lapatenna delleng batu). **43** Sibarembenkenna, ipetettap Jesus mo ukurna lako laus mi Galilea. Nai pesimbak mo ia dekket si Pilipus, idokken mo mbangsa, "Èkutken mo Aku!" **44** Si Pilipus asalna i Betsaida nai, imo bekkas si Andreas dekket si Petrus. **45** Nai pesimbak nola mo si Pilipus dekket si Natanael, idokken mo mbangsa, "Enggo pesimbak kami dekket kalakna sinidokken si Musa ibas Bukku patinna dekket sinidokken nabi-nabi. Imo Jesus anak si Josep kalak Nazaret." **46** Tapi ialoi si Natanael mo, "Mèter lot mo harapan roh simendè i Nazaret nai?" "Ita mo asa idah kono!" nina si Pilipus mengaloi. **47** Idah Jesus kessa mo roh si Natanael mendahisa, idokken Jesus mo terrèngètsa, "Èn mo sada kalak Israel bennar, oda lot sipakulah-kulah bana!" **48** Nai idokken si Natanael mo taba Jesus, "Bakunè carana pemmettohmu terrèngèt aku?" Ialoi Jesus mo, "Kuidah ngo kono i terruh kayuara i, sinderrang madèng idiloi si Pilipus idi kono." **49** "Guru," nina si Natanael. "Anak Dèbata ngo kono, Raja kalak Israel!" **50** Nai nina Jesus mo, "Mada ngo kumarna Kudokken i kuidah kono i terruh kayu ara i, memmaing asa gabè percaya kono? Idahenmu mo belgahen dèng daripada i!" **51** Idokken Jesus dèng ma, "Kudokken mo bai ndènè; idahèn ndènè mo mbuka langit, janah merlaus roh malaèkat Dèbata mendahi Anak Jelma."

**2:1** Enggo kessa dua ari, lot mo merbayo i kuta Kana sini Galilea. I sidi ma ngo dekket inang Jesus. **2** Jesus pe dekket sisinNa dekket ngo idilo

merbayo i. **3** Nai tupung mo kerri karina anggur sukut i, nai idokken inang Jesus mo taba Jesus, "Enggo kerri anggur sukut i." **4** Ialoi Jesus mo, "Nangè, ulang pasulak Aku; ai makdèng dapet tikkingku lako memmaing barang kadè." **5** Nai idokken inangna i mo taba perkebbas nisidi, "Barang kadè idokken Jesus taba kènè, bahan kènè mo." **6** Lot mo isidi hantar ennem goci siat-siat ualuhpuluh soh mi serratus sellup laè mahan pemmorih nèhè, mengèkutken hatoren agama kalak Jahudi. **7** Idokken Jesus mo taba perkebbas i, "Domi kènè mo goci i dekket laè." Nai idomi kalak i mo laè mi goci i. **8** Idokken Jesus mo nola taba kalak idi, "Taku mo cituk laè ni goci i, embahken mo taba induk perkebbas." Iembah kalak i mo laè nitakuna i taba induk pèsta i, **9** iakapi mo laè i, keppè enggo mobah gabè anggur. (Oda ngo ibettoh barang i dikè nai rohna anggur i, ai pellin perkebbas i ngo kessa bettoh-bettohen). Nai idiloi induk perkebbas i mo kèla i, **10** nina mo mbannga, "Biasana anggur simerrrasana ngo lebbè ihidangken dèba, tapi mula enggo karina tamuè mengènum mbuè anggur, baru pè asa ihidangken nola anggur biasa. Keppèken kono isimpan kono dèng ngo anggur simerrrasana, janah bagèndari dèng ngo asa ihidangken kono!" **11** Idi mo tanda kellengangen perlebbè ihanaken Jesus, i kuta Kana sini nagerri Galilea. Merkitè tanda kellengangen i, ipacidah Jesus ngo kemulianNa. Nai percaya mo sisinNa i tabaSa. **12** Enggo kessa i, laus mo Jesus bak inangNa rebbak dekket sisinNa i mi Kapernaum, janah i sidi mo kalak i merian barang piga-piga ari. **13** Tikan enggo ndessing Ari Raya Paskah kalak Jahudi, laus mo Jesus mi Jerusalem. **14** Idapet Jesus mo jelma merdèa lembu, biri-biri dekket ndarapati i Bages Dèbata i Jerusalem; bagidi ma dekket simenukari kèpèng merkundulen isidi. **15** Nai ipelias Jesus mo ligas-ligas ipas tinali nai, ijalang mo karina pinakan-pinakan idi i Bages Dèbata nai, biri-biri bak lembu pè. Ipengongkitken mo mèja penukaren kèpèng, merhamburen mo kèpèng kalak idi. **16** Idokken mo taba kalak simerdèa ndarapati, "Embah karina ndrapatimi. Ulang baing kènè gabè bekkas pertiga-tigaan Bages BapangKu!" **17** Nai ièngèt sisinNa i mo ayat Bibèl èn, "Mergollah-gollah ngo bagè api menutung ukum kelleng atèngKu midah Bagesmu alè Pa!" **18** Ialo penguasa-penguasa kalak Jahudi mo Jesus merkitè kata-kata mpingas, nina mo, "Tuduhken bai

nami tanda kellengangen mahan bukti, lot kuasamu memmaing bagidi!" **19** Ialoi Jesus mo, "Rumpakken kènè mo Bages ni Dèbata èn, nai Kupajek nola mo i mengolihi ibagasen tellu ari." **20** "Empatpuluh tahun mo dekkahna pelliasken Bages Dèbata èn, keppèken ipellias kono nimu ibagasen tellu ari sambing?" nina kalak i. **21** Tapi dagingna sendiri ngo sinidokken Jesus Bages Dèbata. **22** Asa balik nggelluh kessa Jesus i kemmatèen nai ièngèt sisinNa i mo nidokken Jesus idi kin. Gabè percaya mo kalak idi mi sittersurat ibas Bibèl, dekket mi kata sinidokken Jesus. **23** Nderrang i Jerusalem Jesus mer Ari Raya Paskah, nterrem ngo kalak percaya bana kumarNa tanda kellengangen sinipehanaNa. **24** Tapi ukum Jesus oda tok midah kalak i, kumarna itandai ngo karina jelma. **25** Oda pella perlu ibagahken dèba keterrangen baNa, ai ibettoh ngo kadè siturah ibagasen pusuh perratèen jelma.

**3:1** Lot mo sada kalak Parisè mergerar si Nikodemus. Sada kalak terpandang ngo ia i agama Jahudi. **2** I sada berngin, roh mo ia mendahi Jesus, mendokken, "Guru, kubettoh kami ngo Ko roh bai Dèbata nai. Ai isè poda ndorok memmaing tanda kellengangen bagè nibaingmu i, kum mak Dèbata denganna." **3** Ialoi Jesus mo, "Èngèt mo; isè poda ndorok mbengket mi Kerajaan Dèbata, ukum mak mengolihi tubuh ia." **4** "Bakunè ngo ndorok mengolihi tubuh jelma, mula enggo mbelgah?" nina si Nikodemus taba Jesus. "Ai ndorok kin mo ia mbengket nola balik mi kurungen manik, asa itubuhkan nola?" **5** Ialoi Jesus mo, "Situhunna ngo sikudokken èn, mula oda kalak itubuhkan ipas laè dekket Tendi Dèbata nai, oda ndorok mbengket ia mi Kerajaan Dèbata. **6** Secara perdagingen itubuhkan ngo jelma bai partuana nai, tapi secara pertendiin itubuhkan Tendi Dèbata. **7** Ulang kono lengang mula Kudokken kennah itubuhkan ngo kènè mengolihi. **8** Menempul ngo angin barang mikè lemмо atèna; sidengkoh ngo sorana, tapi oda nibettoh idikè nai janah laus mikè ia. Bagi ngo jelma sienggo itubuhkan Tendi Dèbata." **9** "Bakunè ndorok terjadi bagi?" nina si Nikodemus mengkusoi. **10** Ialoi Jesus mo, "Kono guru i tengah-tengah kalak Israel, oda ibettoh kono i? **11** Kudokken mo taba kono; kuranaken kami ngo sikubettoh kami, kuindangkan kami ngo

sikuidah kami, tapi oda tok kènè mi sikuindangkan kami i. **12** Salang terrèngèt dunia èn Kusukutken bamu, oda percaya kono bangku, makinsa nola mo mula Kusukutken terrèngèt sorga? **13** Isè poda nung dèng laus mi sorga, tapi ukum i sorga nai enggo lot roh mi dunia èn, imo Anak Jelma. **14** Bagè pemmaing si Musa pedatesken nipè tembaga ipas sada tongket kayu i kellongoon, bagi ngo kennah ipedates Anak Jelma, **15** asa nggelluh karina sipercaya baNa." **16** Ai bagèen ngo ngkelleng atè Dèbata midah dunia èn, Iberrèken ngo AnakNa Sada-sada i, asa ulang mago gennep sipercaya bai Anak idi, tapi asa kenggelluhen siamman sumendah bana. **17** Ai ipasulak Dèbata AnakNa mi dunia èn, oda ngo lako menghukum dunia èn, tapi lako paluahken dunia èn ngo. **18** Barang isè percaya taba anak idi, oda ngo kenna hukum, tapi siso percaya taba Anakna Sada-sada i, kenna hukum ngo. **19** Bagèen ngo hukumna i: Enggo roh penandang i mi dunia èn, tapi lemmoon ngo atè jelma i midah sigellap daripada midah sinterrang i, ai jahat ngo pengelako kalak i. **20** Barang isè maing jahat, nceggo ngo atèna midah sinterrang i, asa mboni pengelakona sijahat i; **21** Tapi barang isè merpengelako mendè, idapetken ngo penandang i, asa ntarar karinana pemmaingna rembang mi sinipergeddo Dèbata. **22** Enggo kessa i, laus mo Jesus rebbak dekket sisinNa mi nagerri Juda. Isidi mo kalak i merrian barang piga-piga ari dekkahna ninganna perridiken jelma. **23** Tapi si Johanes pè peridiken ngo i Ainon, njolmit mi Salim, ai mbuè ngo isidi laè; nai merrohen mo nterrem jelma mi sisi asa iperridi, **24** ai madèng ngo ikurungken si Johanes tikanna i. **25** Mersoal mo tikanna i sisiin si Johanes dekket sada kalak Jahudi tersèngèt hatoren perpangiren i agama kalak Jahudi. **26** Laus mo kalak i mendahi si Johanes, nina mo, "O Guru, ièngèt kono dèng ma ngo kalak siroh mendahi Guru i, tikan i kèparen Laè Jordan, imo nituduhkenmu bai nami tikala i? Bagèndari perridiken ngo ia, janah mèduk ngo kalak roh mendahiSa!" **27** Nai ialoi si Johanes mo, "Oda ndorok jelma memmaingken barang kadè, ukum mak iberrèken Dèbata bana. **28** Otang enggo ngo idengkoh kènè kudokken, 'Oda ngo aku Raja Sipaluah niperbagag-bagah Dèbata. Pellin solo-solona ngo kessa aku, ipasulak roh lebbèen asa Ia.' **29** Kèla ngo sidasa daberru mula enggo jejap kalak i. Asa ukum anak-anak kèla pellin mendengani saming ngo kessa i

janah mendengkoh-ndengkohi, nai sampang mo atèna mula idengkoh sora kèla i. Bagidi ma ngo bang aku pè. Dom ngo sampang atèngku bagèndari. **30** Ia ngo makin mbelgah, tapi ukum aku makin kèdèkna ngo." **31** Barang isè roh i babo nai, ia ngo mengantusi karina jelma. Ukum siroh i dunia èn nai imo kalak sini dunia èn, janah mengeranaken tersèngèt dunia. Ia siroh i sorga idi nai ngo mengatasi karinana! **32** Iranaken ngo kadè siniidah dekket sinidengkohNa, tapi sada kalak poda percaya mi sini ranakenNa idi. **33** Barang isè percaya mi si ni ranakenNa idi, ituhu-tuhui kalak i ngo kebennaren Dèbata. **34** Barang isè iutus Dèbata, isukutken ngo Dèbata, ai iberrèken Dèbata ngo Tendina baNa. **35** Ikekelengi Bapa i ngo AnakNa janah enggo isohken sagumanna mi bagasen kuasaNa. **36** Barang isè percaya taba kalak idi, terolih nggelluh soh mi amman-sumendah ngo ia; tapi barang isè oda percaya taba Anak idi, oda irasai kalak sibagidi nggelluh situhunna. Ihukum Dèbata ngo ia soh sidekkah-dekkahna.

**4:1** Idengkoh kalak Parisè mo buèn dèng ngo iperridi Jesus asa iperridi si Johanes. **2** (Tukasi pè oda ngo dekket Jesus perridiken, tapi pellinsisinNa idi sambing ngo kessa.) **3** Nai ibettoh Jesus kessa mo i, laus mo ia i Judèa nai balik mi Galilea. **4** Tikan perdalanenna idi, kennah memellus arap Samaria ngo Ia. **5** Nai soh mo Jesus mi sada kuta i Samaria i mergarrar Sikhar, imo ndessing mi tanoh niberrèken si Jakob arnia taba anakna si Josep. **6** Lot ngo isidi sada tellaga si Jakob. Kumarna ledjana iakap Jesus merdalan i, kundul mo Ia i biding tellaga i. Kira-kira cèger ari mo i, **7-8** tapi ukum sisiin Jesus enggo laus mi kuta lako menokor bekkel. Nai roh mo sada kalak daberru Samaria mi tellaga i naing menaku laè. Idokken Jesus mo tabasa, "Dikè mo Kuènum dèba laè i?" **9** Ialoi daberru Samaria i mo, "Kasa mengido mènem kono kalak Jahudi taba aku kalak Samaria?" (Ai oda mersaor kalak Jahudi dekket kalak Samaria). **10** Nai ialoi Jesus mo, "Ukum ibettoh kono ngo pemerrèken Dèbata janah itandai kono isè mengido laè bamu i, tentu uè ngo ko mido laè ènumen baNa nai; nai gabè Iberrèken mo bamu laè sipegelluhken." **11** "Tuan," nina daberru i, "salang taku-taku oda lot bamu, janah mbages kalohon ngo tellaga èn. I dikè nai mo dapet Kono laè sipegelluhken i? **12** Ai belgahen ngo kono dok atèmu

asa empung nami si Jakob simemerrèken tellaga èn bai nami. Ia sendiri pè mennaku janah mengènum laè i tellaga èn nai; bagidi ma ngo dukak-dukak bak pinakanna pè?" **13** "Dak muasen ngo karina jelma simengènum laè i tellaga èn nai," nina Jesus, **14** "tapi simengènum laè sinaing berrènkenKu idi, oda nèngè muasen ia soh mi amman summendah. Janah dèng ma, ukum laè siberrènkenKu idi, gabè laè mul ngo i, ibagasen dirina, janah dak menjarir mi ruar, janah memerrèken bana nggelluh situhunna!" **15** Nina daberru i mo, "Tuan, berrè mo bangku laè sibagidi asa ulang muasen nè aku; janah oda perlu nè roh aku mengaleng laè mi sèn." **16** "Laus mo kono lebbè mengaleng sinibalèmu, nai molih nola mo kono misèn," nina Jesus. **17** Ialoi daberru i mo, "Oda lot sinibalèngku." Tuhu ngo nidokkenmi, oda lot sinibalèmu, **18** tapi enggo lima kalak sinibalèmu. Anak laki denganmu sibagèndari i pè oda ngo sinibalèmu." **19** Nina daberru idi mo taba Jesus, "Bagèndari enggo kubettoh nabi ngo Kono. **20** Idokken empung nami i delleng èn ngo kusembah kami Dèbata, tapi bangsa ndènè mendokken pellin i Jerusalem ngo kessa bekkas menembah Dèbata." **21** Nina Jesus mo, "Percaya mo kono. Roh mo tikkina, oda nè i delleng èn barang i Jerusalem bekkas menembah Dèbata. **22** Isembah kènè kalak Samaria ngo siso nitandaan ndènè. Tapi ukum kami kalak Jahudi kusembah kami ngo Ia sikutandai kami, ai bai bangsa Jahudi nai ngo roh kelluahen i. **23** Tapi dapet nè mo tikkina janah enggo roh tupèh, merkitè Tendi Dèbata, isembah karina jelma mo Bapa i. Merpenguèi tahu-tahu mo kalak i bagè nipergeddo atè Bapa. **24** Tendi ngo Dèbata, janah pellin merkitè kuasa Tendi Dèbata ngo kalak ndorok menembah Dèbata Bapa, bagè situhunna ia lot. **25** Nina daberru idi mo mbang Jesus, "Kubettoh ngo naing roh nè mo Raja Sipaluahken i (sinigerarena Kristus). Mula roh kessa Ia ibagahken mo karinana banta." **26** Nina Jesus mo, "Aku ngo i, simengeranai bagèndari dekket kono." **27** Tikan bagidi roh mo sisiin Jesus. Lengang ngo kalak i mengidah Jesus mengeranai dekket sada kalak daberru. Tapi isè poda lot mendokken taba daberru i, "Kadè perlu bamu nangè?" barang taba Jesus, "Kasa mengeranai Kono dekket daberru i?" **28** Nai laus mo daberru i isidi nai lojang mi kuta janah mendokken taba pengisi kuta i, **29** "Ita kènè sidahi kalak simengeranaken bangku karina

ulah-ulahki. Tah mada ngo Ia Raja Sipaluahken i?" **30** Nai merlausen mo pengisi kuta i mendahi Jesus. **31** Sinderrang bagidi, idokken sisiin i mo taba Jesus, "Mangan mo lebbèken Guru i," nina kalak i. **32** Tapi ialoi Jesus mo, "Lot ngo pangaan bangKu siso nibettoh ndènè." **33** Gabè mersidokenken mo sisiin i samahSa, "Mada ngo ndia lot menaruhken pangaan baNa?" **34** Nai idokken Jesus mo, "Pangaan ngo bangKu menguèi lemмо atè sipasulakken Aku, janah mengulaken ulaan niberrèkenNa mahan ulankenKu. **35** Otang idokken kènè ngo, 'Empat bulan nai mo mosim perraniin?' Tapi Kudokken mo taba kènè: Seppè mo tengen kènè! Enggo mo ntua buahna, lako perraniin! **36** Enggo ijalo kalak simerrani i upahna; enggo ipepulung hasilna imo kenggeluhen amman sumendah. Rebbak mersampang atè mo simardang dekket simerrani. **37** Asa tuhu ngo nidokken perumpamaan èn, 'Sisada èn ngo mennuan, tapi sisada adoï ngo merrani!' **38** Kupasulak ngo kè merrani juma siso niula ndènè; sidèban ngo mengula i sidi; tapi kènè ngo menjalo laba ipas ndiula kalak idi nai." **39** Mèduk ngo kalak Samaria pengisi kuta i gabè percaya taba Jesus kumarna pendokken daberru i, "Ibagahken ngo bangku karinana ulah-ulahku idi." **40** Asa pejumpa kessa mo kalak Samaria i dekket Jesus, iendik-endik kalak i mo Jesus, asa isidi lebbè merrian Jesus i. Jadi merrian i sidi mo Jesus dua ari dekkahna. **41** Jadi buèn ngo kalak percaya taba Jesus kumarna peddahNa sendiri taba kalak i. **42** Ai nina kalak i ngo taba daberru i, "Bagèndari enggo percaya kami, oda kumarna pellin nidokkenmu i saming taba kami, tapi kumarna enggo kudengkoh kami sendiri peddahna; janah enggo kubettoh kami, tuhu ngo ia Sipaluah dunia èn." **43** Enggo kessa dua ari dekkahna Jesus i kuta Sikhar, berkat mo ia laus mi Galilea. **44** Enggo kin ngo idokken Jesus, "Oda ngo mersangap nabi i kutana." **45** Soh kessa mo Ia mi Galilea, lolo kalohoon ngo kalak nisidi menjalo Jesus, ai sinderrang i Jerusalem kalak i merari Raya Paskah, idah kalak i ngo karinana nibaing Jesus i sidi. **46** Nai balik mo Jesus mi kuta Kana si ni Galilea, imo kuta bekkasna pennah memmaing laè kembali anggur. Jadi lot mo i Kapernaum sada kalak pugabè istana, mersakit ngo dukakna. **47** Idengkoh kessa mo enggo roh Jesus mi Galilea i Juda nai, idapetken mo Jesus, ièlèk-èlèk mo Jesus, asa roh mi Kapernaum lako

pemalumken dukakna sienggo patè-patèen i. **48** Nai idokken Jesus mo tabasa, "Mula oda idah kènè tanda kellengangen, oda ngo percaya kènè." **49** Gabè nina pugabè istana i mo taba Jesus, "Tuhan, narih pedor mo roh, sinderrang madèng matè dukakku idi." **50** "Molih mo kono," nina Jesus. "Nggelluh mo dukakmu i!" Percaya ngo ia mi sinidokken Jesus i, nai laus mo ia. **51** I tengah ndalan dèng ia lako balik mi bagesna, roh mo naposona mendahisa mendokken, "Nggelluh ngo dukamu idi!" **52** Jadi ikusoi mo kalak i, pukul piga malum iakap dukakna i. Nai ibagahken kalak i mo, "Bari kira-kira tengah ari pukul sada enggo laus singgara i." **53** Gabè ièngèt mo tupung bagidi ma ngo kettikana idokken Jesus tabasa, "Nggelluh mo dukakmu i." Gabè percaya mo ia bak karina sisimpangansa taba Jesus. **54** Idi mo kellengangen pedua kaliken ihanaken Jesus i Galilea, kessa nai roh Ia i Juda nai.

**5:1** Enggo kessa i, lot mo pèsta kalak Jahudi, nai laus mo Jesus mi Jerusalem. **2** I Jerusalem, i gambar Pèntu Biri-biri, lot sada bendar i sisi mergerar Betesda kum i kata Heber. I sikuliling bendar i, lot ngo lima sapo-sapo. **3** Mèduk ngo simersakit mergalèen i èmpèr-èmpèr i; dèba pètung, dèba kèpang, dèba itempuk sigading **Karinana kalak i dak mèma-mèma pergoncang bendar i. 4 Ai susur ngo sipata malaèkat Tuhan menggoncang laè bendar i. Barang isè simersakit i perlebbè masuk mi laè goncang i, kennah malum ngo, barang kadè pè sakitna. 5** Lot ma mo isidi sada kalak daholi enggo tellupuluh ualuh tahun dekkahna mersakit. **6** Idah Jesus mo ia galè isidi, janah ibettoh Jesus ngo enggo bagidi dekkahna ia mersakit janah gampar isidi, gabè nina Jesus mo mbangsa, "Naing malum kono?" **7** Ialoi simersakit i mo, "Ialè tuan, oda lot kadè-kadèngku isèn, lako mendokong aku mi bagasen laè i, tikan goncang. I dèng kebbas aku lako masuk mi bendar i, enggo mo ilebbèi dèba aku." **8** Nai idokken Jesus mo mbangsa, "Kèkè mo ko, balun mo bellagenmu, merdalan mo ko!" **9** Nai mènter malum mo iakap, iembah mo bellagenna, janah merdalan mo ia. Masa ngo i tikan ari Sabat. **10** Kerna naidi, nina berkuasa kalak Jahudm mo taba kalak sirembaru malum i, "Ari Sabat ngo ari èn. Oda ndorok kono merembah bellagenmu i, ai mengellausi hatoren

agama ngo i." **11** Tapi ialoi mo, "Kalak sipemalumken aku i ngo mendokken taba aku, 'Embah mo bellagenmi, merdalan mo kono.'" **12** "Isè mendokken taba kono merembah bellagenmu janah merdalan?" nina kalak i mengkuso. **13** Tapi oda ngo ibettoh barang isè kalakna. Kerna mèduk ngo jelma isidi janah Jesus pè enggo galip mi tengah-tengah jelma nterrem i, lako mennadingken bekkas i. **14** Enggo kessa bagidi, pejumpa nola mo Jesus dekketsa ipas Bages Dèbata, nai nina Jesus mo tabasa, "Bagèndari enggo malum kono, jadi mermanat mo kono, ulang nèngè empè merdosa, asa ulang sempa nola termposiin." **15** Laus mo ia magahken taba kalak perkuasa kalak Jahudi mendokken, Jesus ngo pemalumkensa. **16** Kemmulihkenna idi, gabè nciàn mo atè kalak i midah Jesus, kerna Ipemalum sakit tupung ari Sabat. **17** Tapi nina Jesus mo taba kalak i, "Dak mengula ngo BapaKu; jadi Aku pè kennah mengula ngo." **18** Kumarnaken rana Jesus i, makin itulusi penguasa-penguasa kalak Jahudi mo dalan lako memmunuh Jesus. Ibaing kalak i pè bagidi, oda ngo pellin Ilausi hatoren agama terrèngèt ari Sabat idi saming, tapi dekket ngo kumarna idokken Jesus BapaNa nina Dèbata; merlapaten ngo idi, Ipesobok diriNa dosken Dèbata. **19** Gabè nina Jesus mo mengaloi kalak i, "Èngèt kènè mo sikudokken èn; Oda lot ndorok kadè iulaken Anak idi ukum ipas roka-rokana nai sendiri; tapi pellin niidahna Iulaken BapaNa I ngo ibahanken. Ai barang kadè iulaken Bapa i, idi ma ngo iulaken Anak idi. **20** Kumarna soh mo ngkellengna atè Bapa i midah Anakna i. Jadi ipettarar ngo karina taba anakna i sagumanNa sinibahankenNa. Lebbih dèng tupèh, ai ipettarar ngo taba Anakna i ulaan terhejiin, asa gabè lengang kènè karina. **21** Bagè bapa pegelluhken kalak singgo matè, janah memerrèken taba kalak i kenggeluhen; bagidi ma ngo bang Anak idi pè memerrèken kenggeluhen taba barang isè kalak naing berrènkenNa dok atèna. **22** Isè poda ihukum Bapa i. Kerna karina kuasa lako menghukum enggo isohken taba AnakNa i. **23** Ibakin Bapa i pè bagidi, asa karina kalak menghormati Anak idi, tosè bagè penghormatina taba Bapa i. Barang isè oda pesangapken Anak i, codi ngo oda pesangapken Bapa sipasulakken Anak idi. **24** Kubagahken mo bai ndènè: Barang isè mengeradum-radumi katangKu, janah percaya taba sipasulakken Aku, baNa ngo kenggeluhen

siamman sumendah, janah oda ngo ihukum ia. Enggo maluah ia ipas hukumen kemmatèn idi nai. **25** Percaya mo kènè taba Aku -- 'Roh mo tikkina, enggo mo soh idi bagèndari -- simatè idi pè mendengkoh sora Anak Dèbata ngo, janah nggelluh ngo simendengkoh sora Dèbata. **26** Bagè Bapa i sendiri benna kenggelluhen, bagidi ma ngo Anak i pè ibaing gabè benna kenggelluhen. **27** Enggo iberrèken Ia hak taba AnakNa lako mendabuh hukum kerna Anak Jelma ngo ia.' **28** Ulang pella kènè lengang mendengkoh èn: Roh mo tikkina, karina kalak sienggo matè i pendèban idi mendengkoh soraNa, **29** gabè karuar i pendèban idi nai. Kalak simengulaken mendè, ipekèkè ngo lako menjalo kenggelluhen. Tapi kalak simengulaken jahat ipekèkè ngo lako menjalo hukum." **30** "Kadè poda terbahan aku ukum ibas kedirinKu nai sambing. Kudabuh pè hukum rembang mi kuasa sikujalo bai Dèbata nai ngo. Kerna naidi sènteng ngo penghukumKu i, ai oda ngo mengèkutken ukurKu sendiri nai sikubakin i, tapi mengèkutken lemmo atè Bapa sipasulakken Aku i ngo. **31** Mula Aku mengindangkan tersèngèt diringku, oda tuhu sikuindangkan i. **32** Tapi lot ngo sidèbaan mengindangkan, janah Kubettoh ngo, tuhu ngo siniindangkenna i. **33** Enggo ipasulak kènè utusen ndènè mendahi si Johannes, janah situhunna ngo i indangkan si Johannes tersèngèt Aku. **34** Kuruapkan pè karina i, oda ngo kumarna perlu bangku pengindangkan jelma, tapi asa maluah ngo kènè. **35** Codi mi togok lakat janah merbendella ngo si Johannes, tapi pellin sigejap sambing ngo kènè sennang menjalo cuhaya togok idi. **36** Tapi belgahen ngo kesaksiinKu daripada kesaksiin si Johannes. Ulaan sinidokken Bapa imo siKuulaken bagèndari, i ngo mengindangkan Aku sinipasulak Bapa i. **37** Janah Bapa simengutus Aku i pè enggo mengindangkan Aku. Oda nung dèng idengkoh kènè sora Bapa, barang pè mengidah abèNa. **38** Ai oda ngo iradum-radumi kènè kataNa, kerna oda percaya kènè taba Aku siniutusNa. **39** Iguruken kènè pè Bibèl, kumarna dok atè ndènè merkitè i dapet kènè kenggelluhen amman-sumendah. Bibèl idi sendiri pè ipeterrang ngo tersèngèt Aku. **40** Tapi laju ngo oda uè kènè roh mendahi Aku, asa dapet kènè nemmuken kenggelluhen soh mi amman-sumendah i. **41** Oda perlu bangku pemoji jelma. **42** Kutandai ngo kènè. Kubettoh ngo oda ngkelleng atè ndènè

midah Dèbata. **43** Roh Aku merkitè-kitè gerar BapangKu, tapi oda ijalo kènè Aku. Tapi mula roh kalak merkitè kuasana sendiri, ijalo kènè ngo ia. **44** Bakunè mo terbakin kènè percaya, mula itulusi kènè ngo pemmojiin samah-samah kènè, janah oda merrusaha kènè, asa ipoji Dèbata Sintèmbul i kènè. **45** Ulang mo dok atè ndènè Kusalahken kènè i hadeppen Bapangku. Si Musa siniharapken ndènè i ngo menalahken kènè. **46** Ukum tuhu ngo percaya kènè taba si Musa, tentu percaya ma ngo kènè taba Aku, kerna ia pè isuratken ngo tersèngèt Aku. **47** Tapi mula oda ikettoki kènè nisuratken si Musa, bakunè mo pengkettoki ndènè mi siKuruapken èn?"

**6:1** Enggo kessa barang sadikè dekkah nola, berkat mo Jesus mi suberrang Tao Galilea (sinigerari ma Tao Tiberias). **2** Nterrem ngo kalak mengèkutkensa, kumarna enggo idah kalak i tanda kellengangen nihanaken Jesus pemmalumken kalak simersakit. **3** Mennangkeng mo Jesus mi uruk nai kundul mo Ia isidi rebbak dekket sisinNa. **4** I katika i enggo mo ndessing Ari Raya Paskah kalak Jahudi. **5** Tikan itengen Jesus merkuliling, idah mo kalak merrohen merkolan-kolan mendahiSa. Nai idokken mo taba si Pilipus, "I dikè nai mo sitokor pangaan, asa ndorok mangan karinana jelma nterrem èn?" **6** (Idokken Jesus pè bagidi, mengunjuni si Pilipus ngo Ia, aiibettoh kin ngo sinaing bakinenna.) **7** Ialoi si Pilipus mo, "Sitokor pè roti dua ratus kèpèng pirak, oda cukup bai jelma mbellang èn giam tersituk pè." **8** Nai sada kalak ibas sisiin idi nai, imo si Andreas anggi si Simon Petrus mendokken, **9** "Lot ngo isenda anak-anak daholi merembah lima roti dekket dua ikan. Tapi kadè mo lapatenna bai jelma bagèen buèna?" **10** Nai idokken Jesus mo taba sisinna i, "Dokken kènè mo kundul jelma mbellang i karinana." Jadi merkundulen mo karinana kalak idi i babo dukut-dukut i, ai mbellang ngo jampalen i sidi. Karinana kalak idi lot ngo kira-kira lima ribu kalak daholi. **11** Nai ibuat Jesus mo roti i, idokken mo lias atè taba Dèbata. Enggo kessa i Ipembagikan mo roti i bai jelma mbellang i. Ikan idi pè, bagidi ma ngo ibakin. Nai mangan mo kalak idi karinana janah bessur. **12** Enggo kessa bessur mangan kalak idi karina, idokken Jesus mo taba sisinNa, "Pepulung kènè mo pangaan siso kerri i karina, ulang lot magosia." **13** Ipepulung sisinna i mo siso kerri i, dom

sipuluh dua baka, imo siso kerri jelma mbellang i, ipas silima roti idi nai. **14** Idah jelma mbellang idi kessa mo kellengangen sini hanaken Jesus i, nina kalak i mo, "Èn ngo tuhu Nabi i, sinaing roh mi dunia èn!" **15** Naing mo ipaksa kalak i Jesus gabè rajana, tapi ibettoh Jesus ngo taki kalak idi i, laus mo Ia sadasa mi delleng ninganna mengillak. **16** Enggo kessa ramben ari, laus mo sisiin Jesus mi tao. **17** Ibengketti kalak i mo bungki, nai isuberrangi kalak idi mo taoi i, lako laus mi Kapernaum. Enggo pè gellap laju ngo madèng roh Jesus mendahi kalak idi. **18** Tikanna i enggo mulai goncang laut i kumarna angin sapa-sipu. **19** Enggo kessa ikayuhken kalak i kira-kira lima barang ennem batu mi tao; keppè sintempu mo idah kalak i roh Jesus mi bungki kalak idi, merdalan i babo laè i. Gabè buradan mo sisiin i. **20** Tapi nina Jesus mo taba kalak idi, "Ulang kènè mbiar, Aku ngo èn!" **21** Ibagasen sennang pennarihen ijalo kalak i mo Ia mbengket mi bungki i, janah gejakenna i soh ma mo bungki kalak i mi tujunna. **22** Sibarembenkenna i, oda lot bungki idah jelma sitading i, laènken bungki sisada bari. Ibettoh kalak idi ngo tangkas enggo laus sisiin i perlebbè, janah oda ngo dekket Jesus ibagasen bungki i rebbak dekket sisinna i. **23** Tapi lot mo prau i Tiberias nai janah merlabuh ndessing mi bekkas kalak idi mangan i, imo tikan idokken Jesus lias atè taba Dèbata. **24** Ibettoh kalak idi kessa mo, oda i sidi Jesus bak sisinNa pè, ibengketti kalak i mo prau i, nai laus mo kalak i mi Kapernaum mennulusi Jesus. **25** Jumpa kalak idi kessa mo Jesus i suberrang tao i, ikusoi kalak i mo Ia, nina mo, "Guru, ndigan i kono soh mi sèn?" **26** Ialoi Jesus mo, "Kudokken mo taba kènè; itulusi kènè pè Aku, oda ngo kumarna enggo iarti kènè tanda kellengangen sienggo Kuhanaken i, tapi kemulihkan bessur i ngo kènè. **27** Ulang mo tulusi kènè pangaan siuè kerri janah uè macik. Tapi mengula mo kènè lako menulusi pangaan siso uè macik, janah merrèken kenggeluhen situhunna, imo sinaing berrènken Anak Jelma bai ndènè. Kerna bana ngo enggo Ikuasakan Bapana Dèbata." **28** Nai ikuso kalak i mo Ia, "Bakunè ngo kubaing kami asa ndorok kuulaken kami ulaan lemmo atè Dèbata?" **29** Ialoi Jesus mo, "Èn mo ulaan lemmo atè Dèbata. Keppercayai kènè mo Ia sinipasulak Dèbata." **30** "Mula bagidi," nina kalak i, "Kadè ngo tanda kellengangen i ihanaken Kono sindorok kuidah kami asa percaya kami

baMu? Kadè mo ndorok ibaing Kono? **31** Ukum empung nami mangan manna ngo tikan i kelongoon, ai tersurat ngo ibas Bibèl, 'Iberrèken ngo kalak idi mangan roti i sorga nai!' " **32** Nai idokken Jesus mo taba kalak i, "Kudokken mo taba kènè: Oda ngo si Musa merrèken pangaan idi i Sorga nai bai ndènè, tapi BapangKu ni sorga i ngo merrèken roti situhunna, i sorga nai bai ndènè. **33** Ai niberrèken Dèbata i sorga idi nai, imo ia siroh i sorga nai memerrèken nggelluh situhunna bai dunia ènda." **34** "Guru," nina kalak i, "roti sibagidi mo dak berrèken bai nami." **35** "Aku ngo roti kenggelluhen i," nina Jesus taba kalak i. "Barang isè roh mendahi Aku, oda nèngè mellèhè ia. Janah barang isè percaya taba Aku, oda nèngè muasen ia. **36** Enggo Kudokken taba kènè: Ai tukasi pè enggo idah kènè Aku, tapi oda percaya kènè. **37** Karina sienggo iberrèken Bapa bangKu, roh ngo i mendahi Aku, janah oda ngo Kutulak barang isè roh mendahi Aku. **38** Roh Aku i sorga nai, oda ngo memmahanken roh-roh gèutku saming, tapi memmahanken lemmo atè simengutus Aku i ngo. **39** Èn mo lemno atè simengutus Aku: Ulang nemmu lot mago barang isè sienggo niberrèkenNa i bangKu, tapi asa Kupegelluh kalak i mengolihi tikan Ari Kiamat! **40** Ai èn ngo ipergeddo BapangKu: Barang isè sienggo mengidah Anak idi janah percaya baNa kupegelluh mo ia i Ari Kiamat janah bana mo kenggelluhen siamman sumendah." **41** Nai ngutnguten mo kalak Jahudi taba Jesus kumarna nidokkenna i, "Aku ngo roti siroh i sorga nai." **42** Nina kalak idi, "Otang Jesus ngo ia, anak si Josep; otang sitandai ngo bapaNa dekket inangNa? Bakunè asa idokken roh i sorga nai Ia?" **43** Nai nina Jesus mo taba kalak i, "Ulang kènè ngutnguten. **44** Isè poda ndorok roh mendahi Aku, mula oda ipadiat BapangKu sipasulakken aku i ia roh mendahi Aku; janah karina sienggo roh mendahi Aku Kupekkèkè mo ia i Ari Kiamat. **45** Lot ngo tersurat ibas Bukku Nabi-nabi bagèen, 'Karinana jelma iajari Dèbata.' Asa karina jelma singgo mendengkoh janah menjalo peddah bai Bapa nai, roh ngo ia mendahi Aku. **46** Oda ngo merlapaten i, enggo lot jelma mengidah Bapa. Ai pellin ia singgo roh bai Dèbata nai ngo kessa sienggo mengidah Bapa i. **47** Kudokken mo taba kènè, 'Barang isè percaya taba Aku ia ngo mengerrasai nggelluh siamman-sumendah.' **48** Aku ngo roti kenggelluhen i. **49** Mangan manna ngo empung ndènè i

kellongoon, tapi matè ngo kalak idi. **50** Tapi oda ngo bagi ukum roti si susur i sorga nai; barang isè kipangan roti idi oda matè nèngè ia. **51** Aku ngo roti sisusur i sorga nai -- roti memmerrèken nggelluh. Barang isè kipangan roti èn, nggelluh mo ia soh mi amman sumendah. Roti sinaing Kuberrèken i, imo dagingKu mahan kenggelluhen jelma sini dunia èn." **52** Gabè petongkah sora mo kalak Jahudi samahsa kemulihkan pendokken Jesus i, "Bakunè ngo pemmaing kalak ènda memerrèken dagingNa sipangan?" nina kalak i. **53** Nai nina Jesus mo taba kalak i, "Percaya mo kènè mula oda ipangan kènè daging Anak Jelma, janah mula oda iènum kènè darohNa, oda tahu-tahu kènè nggelluh. **54** Barang isè kipangan dagingKu, janah mengènum darohKu, bana ngo kenggelluhen siamman sumendah, janah Kupegelluh ngo ia i Ari Kiamat. **55** Ai dagingKu ngo pangaan situhunna, janah darohKu ngo ènumen situhunna. **56** Barang isè kipangan dagingKu janah mengènum darohKu, nggelluh mo ia rebbak dekket Aku, janah Aku ibagasen ia. **57** Tosè bagè Bapa singgelluh i mengutus Aku, janah Aku nggelluh ibagasen Bapa, bagidi ma mo barang isè kipangan dagingKu nggelluh ibagasen Aku. **58** Èn ngo pangaan susur i sorga nai; oda bagè pangaan nipangan empung ndènè i. Ai enggo kessa ipangan kalak i pangaan idi, matè ngo kalak i. Tapi barang isè kipangan pangaan ènda, nggelluh mo ia soh mi amman sumendah." **59** Karinana i, idokken Jesus sinderrang mengajari Ia i bages perguruun, i Kapernaum. **60** Mendengkoh karina nidokken Jesus i, mèduk ngo sisinNa mendokken, "Mpihir ngo peddah i, isè mo ndorok mengantusi idi!" **61** Ibettoh Jesus sendiri ngo, ngutnguten sisinNa tersèngèt kata idi. Nai gabè idokken mo taba kalak i, "Mèter kebberraten ngo kènè kumarna kata idi? **62** Bakunè nola mo mula idah kènè Anak Jelma balik mi bekkasNa kin? **63** Tendi Dèbata ngo simemmaing jelma nggelluh. Oda ngo merguna ukum gegoh jelma. Ukum kata sienggo Kuruapken i taba kènè, kata Tendi Dèbata ngo i janah kata kenggelluhen. **64** Tapi lot bai ndènè nai oda percaya." (Enggo kin ngo ibettoh Jesus i mulana nai isè siso percaya bak simenelbuhSa). **65** Nai nina Jesus nola mo, "Kumarna naidi ngo asa Kudokken taba kènè: Isè poda terbakinSa roh mendahi Aku, ukum oda ipadiat Bapa i." **66** Mulai i sidi nai, mèduk ngo sisinNa mennadingkenSa, oda nèngè uè mengèkutken

Jesus. **67** Nai ikusoi Jesus mo sisinNa sisipuluh dua i, "Mada ngo kènè pè naing mennadingken Aku?" **68** "Tuhan," nina si Simon Petrus tabaSa, "Mikè mo kami laus? Ai bamu ngo kessa lot kata kenggelluhen. **69** Enggo percaya janah tok kami bagèndari, Kono ngo simbadia roh bai Dèbata nai." **70** Nai nina Jesus mo taba kalak i, "Otang sipuluh dua kènè singgo Kupilih? Tapi tendi jahat ngo sada bai ndènè nai!" **71** Si Judas Iskariot ngo nidokken Jesus i ranana idi. Ai ia ngo sada ipas sisipuluh dua kalak i nai simenelbuh Jesus.

**7:1** Enggo kessa i, iagahi Jesus mo nagerri Galilea. Oda uè ia mi nagerri Juda, kumarna mertaki ngo pengulu-pengulu Jahudi naing memmunuhSa. **2** Enggo ndessing tikanna i Ari Raya Undung-undung. **3** Nai idokken dengan sibeltek Jesus mo tabaSa, "Tadingken mo bekkas èn, janah laus mo kono mi Juda, asa idah sisinMu niulakenMu idi. **4** Isè poda lot memmoniken nibahankenna, mula naing termurmur ia. Mula enggo ibahanken kono bagidi, kennah ngo ibettoh suberri dunia èn!" **5** (Ai denganNa sibeltek pè oda ngo percaya baNa.) **6** "Oda dèng dapet tikkingKu," nina Jesus taba kalak idi, "tapi ukum bai ndènè, gennep tèk ngo ndorok. **7** Oda ngo ikecegoken dunia èn ukum kènè, tapi ukum Aku ikecegoken ngo, Kumarna dak Kupincang dunia èn terèngèt kejahatenna. **8** Laus mo kènè mi pèsta idi. Ukum Aku, oda dèng laus, kerna makdèng dapet kettikangKu." **9** Bagidi mo pendokken Jesus taba denganNa sibeltek, nai tading i Galilea ngo ukum Ia. **10** Enggo kessa laus denganNa sibeltek mi pèsta idi, laus ma mo Jesus mboni-mboni mi pèsta i, isè poda bettoh-bettohen. **11** Dak itulusi perkuasa kalak Jahudi ngo Ia i pèsta i ninganna ikuso-kusoken, "Idikè ngo Ia?" **12** Nai mèduk ngo kalak menerèngètisa merkitè kosik-kosik. Dèba mendokken, "Kalak bujur ngo ia." Lot ma dèba mendokken: "Oda! Mengelalingken jelma nterrem ngo ia." **13** Tapi isè poda pang menerèngètisa ntarar i tengah jelma nterrem, kumarna mbiar ngo kalak idi midah penguasa-penguasa kalak Jahudi. **14** Tupung pertengahan pèsta i, ibengketti Jesus mo Bages Dèbata, janah mengajar mo ia i sidi. **15** Lengang kalohoon mo penguasa-penguasa kalak Jahudi, nina kalak i mo, "Idikè nai ngo bagi pemettoh kalak èn, ai so

barang mersikkola Ia?" **16** Ialoi Jesus mo, "Karina siKupeddahken idi, oda ngo peddahKu sendiri i, tapi peddah Dèbata simengutus Aku i ngo. **17** Barang isè menguèi lemмо atè Dèbata, ibettoh ngo tah bangKu nai sendiri siKupeddahken i, barang tah bai Dèbata nai. **18** Ai barang isè mengerana ipas dirina nai, imo magahken sèkel ia asa ipesangap dèba dirina. Tapi barang isè menmulusi kessangapen bai sipasulakkensa imo kalak bujur; oda lot akkal-akkal bana. **19** Otang enggo lot pati-patiin si Musa bai ndènè? Tapi isè poda kènè mengulaken pati-patiin i. Kasa naing ibunuh kènè Aku?" **20** Ialoi jelma nterrem i mo, "Ah, kalak sasèk ngo kono! Isè sinaing memmunuh Kono?" **21** Ialoi Jesus mo, "Pellin sada ngo Kuulaken bahaan tikan ari Sabat lengang kènè karinana. **22** Ibaing si Musa ngo pati-patiin bai ndènè asa mersittak (mertakkil). Janah kumarnaken naidi itakkil kènè mula pè tupung ari Sabat. (Oda ngo nemmu si Musa perlebbè menghatorken menittak jelma, tapi empungta sinderrang madèng lot si Musa ngo.) **23** Mula isittak kènè jelma tupung ari Sabat lako mengèkutken pati-patiin si Musa, kasa mellaga kènè taba Aku kumarna kupemmalum bolet jelma i tupung ari Sabat? **24** Ulang mo kènè menghukum-hukumi sitaridah saming, tapi hukum mo ibagasen adil janah bennar." **25** Nai lot mo barang piga-piga kalak i Jerusalem mendokken: "Otang kalak èn ngo si dak tong itulusi naing ibunuh? **26** Tapi tengen mo! Mengerana ngo Ia ntarar i lebbè-lebbè sinterrem, keppè isè poda pang mendokken barang bakunè tabaSa! Tah mada ngo enggo satdar penguasa-penguasanta, kalak ènda ngo Raja Sipaluah niperbagah-bagah Dèbata? **27** Tapi mula roh Raja Sipaluah niperbagah-bagah Dèbata, isè poda bettoh-bettohen barang i dikè nai pekirohNa. Tapi ukum kalak ènda, sibettoh ngo barang i dikè nai asal-usulna." **28** Sinderrang mengajar Jesus i Bages Dèbata nggang mo idiloken, "Tuhu-tuhu ngo ibettoh kènè isè Aku janah i dikè nai asal usulKu? Roh aku oda ngo ipas lemмо-lemmongKu nai. Tapi lemмо atè sipasulakken aku i ngo, tapi oda ngo itandai kènè ukum Ia. **29** Ukum aku kutandai ngo Ia, ai Ia ngo pasulakken Aku asa roh." **30** Jadi segat-segaten mo kalak idi, naing itangkup mo Jesus, tapi ise poda lot mengellaluken tanganNa, kerna makdèng dapet tikkina. **31** Tapi mèduk ngo bai kalak nisidi nai gabè percaya tabaSa janah mendokken, "Mula roh Raja Sipaluah

niperbagah-bagah Dèbata idi, harapen ma ngo ndia terhanakensa tanda kellengangen buèn dèng dari pada sienggo nihanaken kalak ènda?" **32** Idengkoh Parisè mo kosik-kosik jelma nterrem i tersèngèt Jesus. Kerna naidi ipasulak kalak i bak imam-imam ekuten mo barang piga-piga kalak penjaga Bages Dèbata lako menangkap Jesus. **33** Idokken Jesus mo, "Sigejap nai ngo kessa rebbak Aku dekket kènè, ai molih mo Aku mendahi simengutus Aku. **34** Itulasi kènè mo Aku, tapi oda jupa kènè Aku: Ai oda terdahi kènè bekkas sidahinKu idi." **35** Nai mersidokenken mo penguasa-penguasa kalak Jahudi samahsa, "Naing laus mikè ndia Ia, asa mèter oda jupa kita Ia? Mada ngo naing laus Ia ndia mendahi kalak Jahudi ni ruar nagerri imo i tengah-tengah kalak Junani, janah gabè mengajari kalak Junani? **36** Kadè ngo ndia maksudNa: Itulasi kènè mo Aku, tapi oda jumpa kènè Aku, dekket ai oda terdahi kènè bekkas sidahinku idi?" **37** Ari perpod i mata pèsta idi, cènder mo Jesus tupung mata pèsta i, narih nggang mo idiloken, "Barang isè muasen, roh mo ia mènem taba Aku. **38** Ai tersurat ngo ibas Bibèl bagèen: Barang isè percaya taba Aku, marir ngo ibas pusuh peratèenna nai laè mul simemerèken kenggeluhen." **39** (Tendi Dèbata ngo nidokken Jesus isidi, sinaing jaloonkalak sipercaya tabaSa. Ai oda dèng ngo iberrèken tikala i Tendi Dèbata, kerna madèng ipesangap Jesus merkitè permatèNa.) **40** Mbuè ngo kalak mendengkoh nidokken Jesus i. Nai lot mo kalak ipas simendengkoh idi nai mendokken, "Tuhu ngo Nabi kalak èn!" **41** Lot ma ngo dèba mendokken, "Èn ngo Ia Raja Sipaluah niperbagah-bagah Dèbata." Tapi lot ma ngo dèba mendokken, "Ah, mèter i Galilea nai mo asalna Raja Sipaluah idi? **42** Ai tersurat ngo ipas Bibèl ukum Raja Sipaluah i, arap usur si Daud nai ngo rohna, janah bekkasna tubuh pè i Betlehem ngo, imo lebbuh si Daud." **43** Ujungna gabè petongkah sora mo jelma ni sidi tersèngèt Jesus. **44** Lot ngo dèba naing menangkapSa, tapi isè poda mengellaluken tanganNa. **45** Nai balik mo penjaga-penjaga Bages Dèbata pasulaken sinaing menangkap Jesus i mendahi imam-imam ekuten bak kalak Parisè. Nai ikusoi kalak i mo pasulaken i, "Kasa oda iembah kènè Ia mi sèn?" **46** Ialoi perjaga-perjaga i mo, "Ah, oda nung dèng lot kalak mengerana bagèSa!" **47** "Haah, tah mada ngo kènè pè enggo iajar-

ajari?" nina Parisè i. **48** "Lot idah kènè sada kalak pè giam penguasa-penguasa kalak Jahudi barang Parisè pè percaya tabaSa? **49** Tapi merjaya ngo jelma nterrem èn siso menandai pati-patiin si Musa!" **50** Sada ibas kalak Parisè idi nai imo si Nikodemus, sienggo nung roh mendahi Jesus. Nai nina si Nikodemus, siroh berngin-berngin mendahi Jesus mo taba denganna Parisè sidèban: **51** "Mengèkutken hukum, oda ndorok sihukumi kalak, ukum makdèng nitangkassen ia, janah mula madèng nidengkoh bak niperrèsò kadè sienggo ibahanken." **52** "Iaah, tah mada ngo kalak Galilea kono? Perrèsò mo lebbè Bibèl! Idahenmu mo oda lot nabi i Galilea nai!" nina kalak i mengaloisa. **53** Nai mersidahi sapona mo kalak i karina.

**8:1** Tapi laus mo Jesus mi Uruk Zaitun. **2** Sibarembekna nola ma, laus nola mo Jesus mi Bages Dèbata; nterrem mo kalak roh mendapatkenSa. Kundul mo Jesus lako mengajari kalak i. **3** Sinderrang bagidi, itaruhken guru-guru agama dekket Parisè mo taba Jesus sada kalak daberru siterdapet merlangkah julu meddem. Idokken kalak i mo cènder daberru i, i tengah-tengah, **4** nai nina kalak i mo taba Jesus, "Guru, terdapet ngo daberru èn merlangkah julu meddem. **5** Ibas Bukku si Musa lot ngo pati-patiin Dèbata mendokken; mula lot daberru terdapet bagèen, kennah ibentiri ngo dekket batu sampè matè. Bagèndari pè bakunè ngo pendapet ndènè?" **6** Tapi ikusoken kalak i pè bagidi, lako mengenggep Jesus ngo, asa ndorok isalahken kalak i Ia. Tapi dak tungkuk sambing ngo ukum Jesus ninganna menurati tanoh i merkitè jari-jariNa. **7** Jadi kumarna dak iempet kalak i mengkuso, ipedorgah Jesus mo takalNa, nina mo, "Barang isè kènè oda merdosa, ia mo perlebbè mementirken batu taba daberru idi." **8** Nai tungkuk nola mo Jesus mennurati tanoh i. **9** Mendengkoh kata Jesus i sinterrem i, laus-laus sada mo kalak i mennadingken Jesus, situa-tuana mo perlebbè. Nai pellin Jesus nai ngo kessa tading i sidi bak daberru idi cènder i bekkasna. **10** Dorgak mo Jesus, idokken mo taba daberru i, "Enggo mikè kalak idi nangè? Oda lot memmaing hukumna bamu?" **11** "Oda lot Guru!" nina daberru i mengaloi. "Oo, Aku pè oda Kuhukum kono. Bagèndari pè laus mo kono, tapi ulang nèngè empet merdosa mi podiin èn," nina Jesus. **12** Nai iulaki Jesus mo mengajari kalak i, nina mo,

"Aku ngo penandang dunia èn. Barang isè mengèkutken Aku, oda harapen merdalan ibas sigellap; bana ngo tupèh penandang simemerrèken nggelluh." **13** Nai nina Parisè i mo tabaSa, "Dirimu ngo iindangken kono. Jadi oda bennar pengindangkenMu idi." **14** Ialoi Jesus mo, "Tukasi pè diringKu Kuindangken, sènteng ngo pengindangkenKu; ai Kubettoh ngo barang i dikè nai Aku roh janah mikè Aku laus. Oda ngo ibettoh kènè barang idikè nai Aku, janah laus mikè Aku. **15** Ihukumi kènè ngo jelma mengèkutken perdagingen, tapi ukum Aku isè poda Kuhukumi. **16** Mula menghukum pè Aku, adil ngo penghukumKu, ai oda ngo punjung sadaKu. Bapa i simengutus Aku ngo denganKu. **17** Ibas patiin si Musa tersurat bagèen: Sah ngo kesaksiin, mula lot dua kalak saksi. **18** Jadi mengkesaksikan Aku pè lot ngo dua kalak -- imo Aku dekket Bapa i simengutus Aku." **19** "Idikè ngo BapaMu?" nina kalak i. Jadi ialoi Jesus mo, "Ai so itandai kènè Aku. BapangKu pè, oda ma ngo itandai kènè. Ukum itandai kènè Aku, Bapa pè pasti ngo itandai kènè." **20** Karinana idi idokken Jesus, tikan mengajari Ia i Bages Dèbata i gambar pèti-pèti bekkas pèlèen. Tapi isè poda pang menangkupSa kumarna makdèng dapet tikkina. **21** Nai nina Jesus nola mo taba kalak i, "Laus mo Aku, jadi itulasi kènè mo Aku, tapi matè mo kènè ibagasen dosa ndènè. Oda terdahi kènè ukum bekkas sidahinKu i." **22** Gabè nina penguasa-penguasa Jahudi mo, "Mada ngo ndia naing mendelles Ia, asa idokken oda terdahi kènè ukum bekkas sidahinKu idi?" **23** Nai nina Jesus mo taba kalak idi, "Ukum kènè, i terruh èn nai ngo kènè, tapi ukum Aku i dates nai ngo. I dunia èn nai ngo ukum kènè; tapi ukum Aku oda ngo i dunia èn nai. **24** Kumarna nai ngo asa Kudokken taba kènè: Matè mo kènè ibagasen dosa ndènè. Tuhu ngo, matè mo kènè ibagasen dosa ndènè, mula laju oda percaya kènè, 'Aku ngo Ia sinidokkenna AKU LOT.'" **25** "Ai isè ngo kono situhunna?" nina kalak i mengkusoi. Ialoi Jesus mo, "Kadè poda gunana nèngè mengerrana dekket kènè! **26** Sandok singgo Kuranaken taba kènè i ngo Aku. Matcam dèng ngo nemmu bagèna sinaing tersèngètenKu bak sipincangenKu terrèngèt kènè. Ai pellin sikudengkoh bana nai simengutus Aku i ngo Kusukutken mi dunia èn, ai kettoken ngo Ia." **27** Oda iantusi kalak i magahken tupung menerèngèti tersèngèt Bapa i ngo ia taba kalak i. **28** Kerna naidi idokken

Jesus nola mo taba kalak i, "Enggo kessa pè ipedates kènè sikali èn Anak Jelma i, ibettoh kènè mo, 'Aku ngo Ia sinigeraren AKU LOT,' janah satdar mo kènè i sidi, oda lot barang kadè Kubahanken ukum ipas lemno-lemno atèngKu nai sendiri. Pellin niajarken Bapa taba Aku i ngo kessa kuranaken.

**29** Janah dakdak ngo rebbak dekket Aku Ia simengutus Aku i. Oda nung ibelli pellin sadaKu, ai dak nipergeddo atèNa ngo Kuulaken." **30** Enggo kessa idokken Jesus karinana i, mèduk mo percaya kalak tabaSa. **31** Nai nina Jesus mo taba kalak Jahudi sienggo gabè percaya baNa, "Mula sètia kènè mengulaken peddahKu, tuhu mo kènè sisinKu. **32** Nai itandai kènè mo Dèbata situhunna, janah kemulihken i, gabè ipaluah mo kènè." **33** "Pemparen si Abraham ngo kami," nina kalak i. "Oda nung dèng kami ihamba barang isè pè! Kadè ngo maksudMu mendokken, 'Gabè ipaluah mo kènè?' " **34** "Situhunna ngo siKudokken èn," nina Jesus taba kalak i. "Hamba dosa ngo barang isè mengulaken dosa. **35** Sada kalak hamba oda lot tettag bekkasna ibagasen bilangen ripè. **36** Kerna i mula ipaluah Anak i kènè, tuhu-tuhu mo kènè maluah. **37** Kubettoh ngo kènè pemparen si Abraham. Tapi naing ibunuh kènè ngo Aku, kumarna oda uè kènè percaya mi peddahKu. **38** Kuranaken ngo siKuidah bai Bapa idi nai; janah kènè pè iulaken kènè ngo barang kadè idokken bapa ndènè." **39** Ialoi kalak i mo, "Si Abraham ngo bapa nami." "Ukum tuhu-tuhu ngo kènè dukak-dukak si Abraham," nina Jesus, "Tentu iulaken kènè ngo bagè pengulaken si Abraham. **40** Pellin memagahken kebennaren sikudengkoh bai Dèbata nai ngo aku mendahi kènè, keppèken naing ibunuh kènè ngo Aku. Ukum si Abraham, oda ngo uè ia memmaing bagidi! **41** Jadi iulaken kènè ngo rembang bagè niulaken bapa ndènè." Nai ialoi kalak i mo, "Ai oda ngo anak gampang kami. Sada ngo bapa nami imo Dèbata." **42** Nai nina Jesus mo taba kalak i, "Ukum tuhu ngo Dèbata Bapa ndènè, ngkelleng mo nemmu atè ndènè midah Aku, ai tuhu ngo roh bai Dèbata nai Aku. Oda roh Aku arap lemno-lemno atèngKu sendiri nai. Ia ngo pasulakken Aku. **43** Kadè sebabna asa oda iarti kènè siKudokken? Kumarna oda tahan kènè mendengkohken katangKu. **44** Sibolis ngo bapa ndènè, janah iulaken kènè ngo nipergeddo bapa ndènè i. Imulana nai ngo pemunuh Sibolis i, ai oda nung ia merpihak mi kebennaren, kerna oda lot kebennaren bana. Mula

merluap ia, titikna ngo i kerna bagidi ngo bakkona. **45** Tapi kumarna Kubagahken bai ndènè tersèngèt kebennaren, ingo sebabna asa oda percaya kènè bangKu. **46** Isè kènè peddapetken Aku merdosa? Mula Kusukutken situhunna, kasa oda percaya kènè taba Aku? **47** Barang isè roh bai Dèbata nai, idengkohken ngo kata Dèbata. Tapi kumarna oda roh bai Dèbata nai kènè, idi ngo maing asa oda idengkohken kènè aku." **48** Gabè nina kalak Jahudi mo taba Jesus, "Otang tuhu ngo sikudokken kami kalak Samaria ngo Kono, janah isellapi sètan ngo kono?" **49** Ialoi Jesus mo, "Oda isellapi sètan Aku. Tapi Kupesangap ngo BapangKu, kènè ngo pellèa-lèaken Aku. **50** Oda ngo kutulusi kesangapen diringku, lot ngo simemmakin mersangap Aku, janah Ia ngo mendabuh hukum. **51** Situhunna ngo siKudokken èn: Barang isè mengu`i ranangKu, oda ngo matè ia soh mi amman sumendah." **52** Nai mènter idokken kalak Jahudi mo taba Jesus, "Bagèndari mo Enggo ntangkas kubettoh kami, enggo tuhu isellapi sètan kono! Si Abraham pè matè ngo, bagi ma ngo bak karina nabi-nabi. Idokken Kono nola, 'Barang isè menguèi katangKu oda matè ia soh mi amman sumendah nimu.' **53** Mula si Abraham enggo matè, bagidi ma ngo bak nabi-nabi idi pè matè ngo, nai isè ngo Kono dok atèmu? Belgahen ngo kono dok atèmu asa empung nami si Abraham!" **54** Ialoi Jesus mo, "Mula Aku pessangapken diringKu, siso mada ngo sangapku. Bapangku ngo pessangapken Aku; imo nidokken ndènè Dèbata ndènè, **55** padahal, oda itandai kènè Ia. Tapi Kutandai ngo Ia. Mula Kudokken oda Kutandai Ia, perluap mo Aku bagè kènè. Kutandai ngo Ia, janah kuuèi ngo kataNa. **56** Sèkel kalohoon ngo bapa ndènè si Abraham naing mengidah aringKu i. Jadi enggo mo idah tuhu, nai dom mo sampang atèna!" **57** Nai idokken kalak Jahudi mo taba Jesus, "Oda dèng ngo giamken dom limapuluh tahun umurMu, mèter idah kono mo si Abraham?" **58** Ialoi Jesus mo, "Ntangkas mo Kubagahken bai ndènè; madèng kin pè tubuh si Abraham, enggo mo lot Aku." **59** Nai mèter ibuat kalak Jahudi mo batu naing mementiri Jesus; tapi galip mo Jesus, janah laus ia i Bages Dèbata nai.

**9:1** Nai nderrang merdalan i Jesus, idah mo sada kalak sipètung, janah

kessa nai tubuh ngo Ia pètung. **2** Ikusoi sisinna i mo Jesus, "Guru, kasa pètung kalak ènda tubuh? Mada ngo kumarna dosana, barang kumarna dosa partuana?" **3** Ialoi Jesus mo, "Oda ngo kumarna dosana, barang kumarna dosa partuana, asa pètung ia tubuh. Tapi, asa ntangkas ngo idah jelma kuasa Dèbata merdalan ibas dirina. **4** Sidekkah mahar, kennah siulaken ngo bahaan simengutus Aku. Tapi sigejap nai ngo kessa asa gellap, isè poda ndorok mahan bahaan nèngè. **5** Aku ngo penendang dunia èn, sidekkah i dunia èn dèng Aku." **6** Enggo kessa idokken Jesus bagidi, ièduri mo tanoh memmahan kubang merkitè tanoh bak èdurna i. Nai Idaloh mo mata sipètung i merkitè kubang i, **7** nai nina mo taba sipètung i, "Lako mo merduhap mi Bendar Siloam." (Siloam lapatenna 'Ipasulak'). Nai laus mo ia merduhap, jadi mèter merpendidah mo ia lako balik. **8** Gabè nina kalak gembar bagesna mo dekket kalak simengidahsa mengido-ngido idi kin mo, "Otang ia ngo dak kundul mengido-ngido tikala i?" **9** Dèba mendokken, "Ia ngo." Tapi lot ma ngo dèba mendokken, "Aku ngo i." **10** "Bakunè ngo perjadina, asa gabè merpendidah kono?" nina kalak i mbangsa. **11** Ialoi mo, "Kalak simergerar Jesus i ngo memmaing tanoh gabè kubang, nai idalohken mo kubang i mi matangku ninganna idokken, 'Laus mo kono merduhap mi Bendar Siloam.' Nai laus mo aku. Jadi enggo kessa merduhap aku, mèter merpendidah mo matangku." **12** "Idikè ngo ia?" nina kalak i tabasa. Ialoi mo, "Oda kubettoh," nina. **13** Iarahken kalak idi mo sipètung idi kin mendahi Parisè. **14** Tupung ngo ari Sabat tikan Jesus pegabèken tanoh jadi kubang i merkitè èdurNa, memmaingken asa gabè merpendidah mata sipètung i. **15** Nai ikusoi kalak Parisè i mo ia, barang bakunè carana asa gabè merpendidah ia. Ialoi mo, "Idalohken ngo kubang mi matangku, nai merduhap mo aku, jadi mèter merpendidah mo aku." **16** Dèba Parisè mendokken tabasa, "Oda bai Dèbata nai asalna simenghanaken èn, ai ilausken ngo pati-patiin agama tersèngèt ari Sabat." Tapi dèba mendokken, "Bakunè mo pemmaing perdosa ndorok mengulaken kellengangen bagèen?" Gabè pejaè-jaè mo pendapat kalak i samahsa. **17** Nai, ikusoi Parisè nola mo sipètung idi kin sikali nai, "Nimu ndai, kalak idi ngo memmaing merpendidah matamu i! Mula bagidi, bakunè ngo pendokkenmu tersèngèt Ia?" Ialoi mo, "Nabi ngo

ia." **18** Tapi oda ngo percaya penguasa-penguasa kalak Jahudi i, ia ngo sipètung idi kin sienggo gabè merpendidah i. Jadi asa percaya kalak idi, idiloi mo partua sipètung i, **19** nai ikusoi mo, "Tuhu ngo èn anakmu sinidokkenmu pètung tubuh i kin? Bakunè nola ngo asa gabè merpendidah ia bagèndari?" **20** Ialoi partuana i mo, "Tuhu ngo èn anak nami, janah tuhu ngo pètung kin ia tubuh. **21** Tapi ukum tersèngèt bakunè nola asa gabè merpendidah ia, oda kubettoh kami. Janah barang isè memmaing ia ndorok merpendidah, ipè oda ma kubettoh kami. Ia mo kusoi kènè, ai enggo mbelgah ia; enggo ndorok ipeterrang sendiri i." **22** Idokken partuana idi pè bagidi, kumarna mbiar ngo ia midah penguasa-penguasa kalak Jahudi; ai enggo sada kata kalak i mendokken, barang isè mendokken Jesus i Raja Sipaluah niperbagah-bagah Dèbata, kennah iliip ngo ia ibas agama nai. **23** I ngo sebabna asa idokken partuana i, "Enggo mbelgah ia, jadi ia mo kusoi kènè." **24** Nai idiloi kalak i nola mo sipètung tubuh idi kin, janah idokken mo mbangsa, "Kupessumpah kami mo kono i hadeppen Dèbata, asa ibagahken kono situhunna, ai kubettoh kami jelma perdosa ngo kum ia." **25** Ialoi mo, "Barang perdosa Ia barang oda, oda kubettoh i. Tapi sada ngo sikubettoh; pètung kin ngo aku, tapi ukum bagèndari enggo gabè merpendidah aku." **26** Nai idokken kalak i dèng ma mo, "Bakunè ngo ibaing taba kono? Kadè ibaing asa gabè merpendidah matamu idi?" **27** Ialoi mo, "Enggo kubagahken idi taba kènè, tapi oda tok kènè. Kasa naing dengkohen ndènè dèng nola? Mada ngo kènè pè naing gabè sisinNa ma?" **28** Mellaga mo kalak i tabasa, nina mo, "Kono ngo sisinNa; kum kami oda. Sisiin si Musa ngo kami. **29** Kubettoh kami ngo, lot rana Dèbata tersèngèt si Musa. Tapi ukum ia, oda kubettoh kami barang idikè nai asal-usulNa." **30** Nai ialoi mo kalak i, "Lengang ukurku, mula idokken kènè oda ibettoh kènè barang idikè nai asal usulNa, keppèken enggo ibuka matanku pètung idi kin gabè merpendidah. **31** Sibettoh ngo, oda idengkohken Dèbata ukum kalak perdosa; pellin kalak simenguèi janah kalak sipessanggapken Dèbata sambing ngo kessa idengkohken. **32** Kessa nai ntembem dunia èn, oda nung dèng terdengkoh, ndorok ibaing jelma merpendidah kalak pètung tubuh. **33** Ukum mak roh bai Dèbata nai ia, oda terbakinsa mahanken bagidi." **34** Nai nina kalak i

mo tabasa, "Bolet ngo kono tubuh ibagasen dosa, naing ajarenmu nola ngo kami?" Nai iliip kalak idi mo ia i agamana nai. **35** Idengkoh Jesus mo enggo iliip kalak Jahudi sipètung tubuh idi kin i kuria nai. Nai pesimbak mo Jesus dekketsa, jadi nina mo tabasa, "Percaya ngo kono taba Anak Jelma?" **36** Nai ialoi mo, "Isè ngo Ia ndia? Petandaken mo bangku, asa ndorok percaya aku tabaSa." **37** Nai nina Jesus mo, "Oda pellin idah kono ia, tapi simengerrana dekket kono bagèndari, idi mo ia." **38** Nai mènter nina sipètung idi kin mo, "Percaya ngo aku Tuhan," janah mènter mersembah mo ia mi hadeppen Jesus. **39** Nai nina Jesus mo, "Roh aku mi dunia èn, lako merembah hukum ngo; imo gabè merpendidah kalak sipètung, janah gabè pètung kalak simerpendidah idi kin." **40** Jadi mengkuso mo kalak Parisè simendengkoh nidokken Jesus nisidi, "Mada ngo dekket kami pètung ibas pendokkenmu idi kin." **41** Ialoi Jesus mo kalak i, "Ukum pètung kin kènè, oda ngo merdosa kènè; tapi kumarna idokken kènè, 'Oda ngo kènè pètung,' gabè hot mo dosa ndènè."

**10:1** Situhunna ngo sikudokken èn bai ndè, "Barang isè masuk mi kandang biri-biri oda arap pèntu, tapi menangkih arap pagar pennangko ngo i janah pendaus. **2** Tapi kalak simasuk arap pèntu, i ngo permakan biri-biri i. **3** Mula roh ia, mèter ibuka perjaga i ngo pèntu bana janah iuèi biri-biri i ngo ranana, gennep idiloi gerar biri-biri i; janah iuluken mo biri-biri i mi ruar. **4** Enggo kessa ruar karinana biri-birina i, mèter kan lebbè ngo ia merdalan, nai dak ièkut-èkut biri-birina i ngo ia, kerna itandai ngo sorana. **5** Oda uè biri-birina i mengèkutken sidèban; merberrus ngo tupèh biri-biri i bai sidèban idi nai, kumarna oda itandai sorana." **6** Oda iarti simendengkoh idi codiin nibaing Jesus i. **7** Nai nina Jesus nola mo, "Situhunna ngo sikudokken èn: Aku ngo pèntu biri-biri i. **8** Karina kalak siroh i lebbènKu, pennangko ngo i janah pendaus, janah oda idengkohken biri-biri i sora kalak i. **9** Aku ngo pèntu i. Barang isè mbengket arap Aku, njuah-njuah ngo ia; karuar masuk mo ia janah terrolih pangaan. **10** Ukum pennangko, roh ngo ia pellin lako mennangko saming, memmunuh bak mencèdaken. Tapi ukum Aku roh, lako merrèken kenggeluhen mertinèncuk ngo taba kalak simendengkohken sorangku. **11** Aku ngo permakan burju. Iberrèken

permakan burju i ngo kessahna mengkepkep biri-birina. **12** Tapi ukum permakan sinigaji siso sidasa biri-biri i, mula idah roh sorigala, mperrus mo ia mennadingken biri-biri i. Gabè ijerngemmi sorigala idi mo biri-biri i janah ipersuragè. **13** Mperrus mo ia, kumarna pellin mengharapken gaji idi saming ngo kessa memmaing asa karèjo ia, ukum biri-biri idi, oda iparduliken. **14** Aku ngo permakan burju. Tosè bagè Bapa menandai Aku, janah Aku menandai Bapa, **15** bagidi ngo Aku menandai biri-biringKu, janah itandai biri-biringKu i ngo Aku. Kuberrèken ngo kessahKu mengkepkep biri-biringku. **16** Lot dèng ngo biri-biringKu sidèban siso i kandang èn nai; biri-biringKu i pè kuuluken ma ngo, janah idengkohken ngo sorangKu. Gabè sada pulungen mo karinana kalak i, janah gabè sada ngo mermakan kalak idi. **17** Ikekelengi Bapa ngo Aku, kumarna Kuberrèken kessahKu, asa kujalo nola i mengolihi. **18** Isè poda ndorok mengerampasi kessahKu, bangku nai. Tapi merkitè selloh ukurku ngo kuberrèken kessahku i. Merkuasa ngo aku merrèken, janah merkuasa ma ngo Aku menjalosa mengolihi. Idi mo ulaan siku jalo bai Bapa nai." **19** Merkitè kata nidokken Jesus i, gabè petongkah sora ma mo kalak Jahudi. **20** Mèduk ngo kalak i mendokken, "Isellapi sètan ngo Ia. Gila ngo Ia. Man kadè pedengkoh-dengkohen ndènè i?" **21** Dèba mendokken, "Oda ngo rana nisellapen sètan bagidi. I dikè mo ndorok ibuka sètan mata kalak sipètung gabè merpendidah?" **22** Nai dapet mo tikkina Pèsta memengket Bages Dèbata i Jerusalem. Enggo mosim mbergoh tikanna idi. **23** Merdalan-dalan mo Jesus i emper si Salomo, i Bages Dèbata. **24** Nai roh mo kalak Jahudi mencingkoisa ninganna mendokken taba Jesus, "Sadikè dekkah nai dak ibelli Kono kami ragu? Ntangkas mo bagahken bai nami, mula Kono ngo tuhu Raja Sipaluah niperbagah-bagah Dèbata!" **25** Ialoi Jesus mo, "Enggo ngo Kubagahken taba kènè tapi oda percaya kènè. Karina ulaan sikuula merkitè-kità gerar BapangKu idi ngo memmagahken terrèngèt Aku. **26** Tapi oda percaya kènè, kerna oda biri-biringKu kènè. **27** Idengkohken biri-biringKu ngo sorangKu. Kutandai ngo kalak i, janah ièkutken kalak i ngo Aku. **28** Kuberrèken ngo kenggeluhen soh mi amman sumendah bai kalak i. Oda mo binasa kalak i soh mi amman sumendah. Isè poda terbakinsa mengerampasi kalak idi i tanganKu nai. **29** Ai belgahen

ngo BapangKu simemerrèken kalak i bangKu, daripada sidèban, barang isè pè i. Asa isè poda ndorok mengerampasi kalak idi ibas gemgemmen Bapa nai. **30** Ai sada ngo Aku dekket Bapa i." **31** Nai mèter ibuat kalak Jahudi mo batu naing mementiri Jesus. **32** Tapi nina Jesus mo taba kalak idi, "Idah kènè ngo Kuulaken bagidi buèna ulaan simerandal sinidokken BapangKu mahan ulankenKu; ibas karinana ulaan singgo kuulaken idi, ulaan paina memmaingken asa naing ibentiri kènè Aku?" **33** Nai ialoi kalak i mo, "Oda ngo kemulihkan ulaan mendè i asa naing kubentiri kami Kono, tapi kumarna ilèai Kono ngo Dèbata. Jelma ngo kono, tapi ipessobok kono nola diriMu bai Dèbata!" **34** Gabè ialoi Jesus mo kalak i, "Otang tersurat ngo ibas Bukku pati-patiin ndènè; bagèen ngo idokken Dèbata, 'Dèbata ngo kènè'? **35** Karinana ngo kita mengaku; karinana sitersurat ibas Bibèl, oda ndorok mondar i. Asa mula taba kalak simenjalo kata Dèbata, idokken Dèbata, kalak idi dèbata, **36** kasa idokken kènè Aku mengelèai Dèbata? Padahal ipilih Bapa i ngo Aku janah iutus mi dunia èn. **37** Mula oda Kuulaken ulaan Bapa, ulang kènè percaya taba Aku. **38** Tapi kerna Kuulaken ngo ulaan Bapa, tukasi pè nemmu oda tok kènè bangku, merkitè-kitè ulaan siKuulaken idi mo nemmu giamken kènè kennah percaya, asa ibettoh kènè, ibagasen Bapa i ngo Aku, janah ibagasen Aku ngo Bapa idi." **39** Jadi naing mo itangkup kalak i Jesus, tapi maluah ngo ia i tangan kalak idi nai. **40** Balik mo Jesus mi Kepar Laè Jordan, mi bekkas si Johanes tikala iperidiken jelma nterrem, janah merrian i sidi mo ia. **41** Mèduk ngo kalak merrohen mendahisa janah mendokken, "Ukum si Johanes, oda lot memaing tanda kelengangen tapi tuhu ngo karina nidokken si Johanes tersèngèt kalak ènda." **42** Mèduk ngo kalak gabè percaya taba Jesus i sidi.

**11:1** Lot mo sada kalak simersakit mergerar si Lazarus. I Betania ngo kutana rebbak dekket si Maria bak si Marta turangna i. **2** Si Maria imo simeminaki nèhè Jesus merkitè minak mur, janah mengelapui merkitè bukna. **3** Duana ngo kalak simerkaka-kuanggi i magahken berrita mersakit turangna i bai Jesus, "Tuhan, mersakit ngo supan-supanmu nikekellengen atèmu i." **4** Idengkoh Jesus kessa mo berrita i, nina mo, "Oda ngo

kemmatèen ujung sakitna i, tapi asa mersangap ngo gerar Dèbata, janah kumernaken i mo asa mersangap Anak Dèbata." **5** Ngkelleng ngo atè Jesus midah si Marta bak taba anggina si Maria bang taba si Lazarus pè. **6** Tapi enggo pè ibettoh Jesus mersakit si Lazarus i, ndong dèng ngo ngo Ia i bekkasna i dua ari nai. **7** Enggo kessa i, nina Jesus mo taba sisinNa, "Ita kènè mo balik mi Juda." **8** Nai nina sisinna i mo mengaloi, "Rabi, rembaru dèng naing ibentiri kalak Jahudi kono dekket batu, keppèken naing iolihi Kono dèng ma mi sidi?" **9** "Otang sipuluh dua jom ngo sidari?" nina Jesus. "Oda nggèut terdengdeng kalak simerdalan mahar, kerna idah ngo penendang dunia èn. **10** Tapi barang isè merdalan tikan gellap, terdengdeng ngo ia, ai oda lot penendang bana." **11** I mo idokken Jesus. Nai nina nola dèng ma mo, "Enggo meddem supan-supanta si Lazarus, laus mo Aku mendungoisa." **12** Nai nina sisinna i mo, "Tuhan, mula terpeddem ngo si Lazarus i, lako njuah mo i." **13** Keppè ukum maksud Jesus, enggo ngo matè si Lazarus. Tapi ukum dok atè kalak idi terpeddem saming ngo. **14** Kerna naidi ntangkas mo ibagahken Jesus, "Enggo matè si Lazarus. **15** Tapi tuahna mo oda i sidi Aku tikanna idi kerna sellohen ngo bagidi, asa percaya kènè. Kita kènè mo laus mendahisa bagèndari." **16** Nai nina si Tomas nidokkenna ma Didimus (leppa) mo taba sisiin, "Laus ma mo kita, asa rebbak matè kita dekketSa!" **17** Tikan soh Jesus mi sidi, enggo mo empat ari dekkahna si Lazarus idi itanem. **18** Daoh Betania i Jerusalem nai kira-kira tellu batu (dua pal). **19** Toko ngo mèdukna roh kalak i Jerusalem nai lako mengapoi si Maria dekket si Marta, kemulihken permatè turangna si Lazarus i. **20** Ibettoh si Marta kessa mo enggo roh Jesus, mèter karuar mo ia menimbaki Jesus. Tapi ukum si Maria tading ngo i bages. **21** Nina si Marta mo taba Jesus, "Tuhan ukum isèn kin kono, oda matè turangki. **22** Tapi tukasi pè bagidi kubettoh ngo, bagèndari pè iberrèken Dèbata ngo bamu barang kadè saming pè ipido kono." **23** "Nggelluh ngo mengolihi turangmu i," nina Jesus taba si Marta. **24** Ialoi si Marta mo, "Kubettoh ngo balik nggelluh si Lazarus i segen, tikan karinana kalak simatè ipegelluh tupung Ari Kiamat." **25** "Aku ngo memerrèken kenggelluhen dekket pekèkèken kalak simatè; barang isè percaya taba

Aku, nggelluh ngo ia tukasi pè enggo matè," nina Jesus taba si Marta. **26** "Kalak singgelluh janah percaya taba Aku, oda ngo matè ia soh mi amman-sumendah. Percaya ngo kono isi?" **27** "Uè Tuhan, percaya ngo aku. Kono ngo Mesias, Anak Dèbata, Raja Sipaluah roh mi dunia èn." **28** Enggo kessa idokken si Marta ranana idi, laus mo ia mengaleng si Maria anggina i, ikosikken mo mbangsa, "Enggo roh Guru i, Ikusoken ngo tersèngèt kono." **29** Mendengkoh i, mèter cènder mo si Maria, sagal-sugul mo ia mendahi Jesus. **30** Oda dèng ngo soh tikanna i Jesus mi rumah. Tong dèng ngo Ia i bekkas simbak dekket si Marta i. **31** Idah kalak Jahudi siroh mengapoi silot i bages i mo kèkè si Maria janah rada-rudu mi ruar; gabè ièkutken kalak i mo ia, ai idok kalak i laus mi kuburen ia lako tangis. **32** Soh kessa si Maria janah idah kessa Jesus ninganna idokken, "Tuhan, ukum isèn kin Kono, oda ngo matè turangki!" **33** Idah Jesus kessa mo tangis si Maria bak kalak Jahudi siroh rebbak dekket si Maria i, mellui kalohon mo atè Jesus. **34** Ikusoi Jesus mo kalak i, "Idikè ngo ia ikuburken kènè?" Nai nina kalak i mo, "Roh mo kono mengidah, Tuhan!" **35** Nai tangis mo Jesus. **36** Gabè nina kalak Jahudi mo, "Tengen mo ngkelleng atèna taba si Lazarus i!" **37** Tapi lot ma ngo dèba mendokken, "Kalak sipètung gabè merpendidah ngo ibaing, oda ngo ndia tersondatsa, asa ulang matè si Lazarus i?" **38** Ibagasen bonek kalohoon, idahi Jesus mo kuburen i. Bagè liang ngo kuburen i, itutup dekket batu mbellen kalohoon. **39** "Pesis kènè mo batu i," nina Jesus. Tapi ialoi si Marta mo, "Tuhan, enggo empat ari ia itanem, tentu enggo mbau i!" **40** Idokken Jesus mo taba si Marta, "Otang enggo Kudokken bamu: Mula percaya kono, idah kono ngo kemmuliaan Dèbata!" **41** Nai ipesis kalak i mo batu tutupna i. Itarè Jesus mo mi langit ninganna idokken, "Ialè Pa, kudokken mellias atè bamu, kerna idengkohken Ko pengidonKu. **42** Kubettoh ngo dak idengkohken Kono ngo pengidonKu, tapi Kudokken i, kumarna jelma nterrem silot i sèn ngo; asa percaya kalak idi, Kono ngo pasulakken Aku." **43** Enggo kessa i idokken Jesus bagidi, nggang mo idiloken, "O Lazarus, karuar mo kono!" **44** Nai mèter karuar mo tuhu si Lazarus sienggo matè i kin. Merbalut dèng ngo tangan bak nèhèna dekket kaèn kapan, janah abèna pè mertutup dèng ma ngo tong. "Osari kènè mo kaèn kapanna i," nina

Jesus taba jelma nisidi, "asa merdalan ia." **45** Mèduk ngo kalak Jahudi siroh mengapoi si Maria i gabè percaya taba Jesus, enggo kessa idah kalak i simasa i. **46** Tapi lot ma ngo dèba bai kalak i nai mendahi Parisè lako magahken sinibaing Jesus i. **47** Kumarna naidi, runggu mo kalak Parisè dekket imam-imam ekuten bagidi ma pè dekket runggu mbellen, nina mo, "Bakunè mo sibakin? Ai toko ngo buèna tanda kellengangen ibaing kalak èn! **48** Mula siebelli bagidi, gabè percaya mo kalak karina baNa. Ujungna roh nola mo kalak Rom lako menaban Bages Dèbata dekket bangsanta pè!" **49** Nai mongkam mo sada kalak bai kalak i nai; imo si Kayafas, imam huntuun tahunna i, nina mo, "Kadè poda pana pemettoh ndènè. **50** Oda ngo satdar kènè, lotiin ngo matè sada kalak mengkepkep bangsanta, daripada karinana nola bangsanta tumpat?" **51** Idokken si Kayafas pè bagidi, oda ngo ipas ukurna nai sendiri i. Tapi kumarna imam huntuun ngo ia, tahunna idi, merralaten ngo ia, kennah matè ngo Jesus mengkepkep bangsa Jahudi. **52** Oda pellin mengkepkep bangsa Jahudi saming, tapi dekket ngo lako pepulungken bak peddemmuken dukak-dukak Dèbata simersèrak i. **53** Mulai i sidi nai mo mertaki pengulu-pengulu Jahudi lako memmunuh Jesus. **54** Kumarna naidi, oda nèngè uè Jesus ntarar merdalan i Juda. Itadingken mo Juda, gabè laus mo ia mi kuta Efraim, i gembar padang gurun. I sidi mo Ia merrian rebbak dekket sisinNa. **55** Enggo mo ndessing tikanna i Ari Raya Pèsta Paskah kalak Jahudi. Enggo mo nterrem kalak idi i suberri kuta nai laus mi Jerusalem, lako pepantingken dirina imo menguras, sinderrang makdèng dapet pèsta i. **56** Sinderrang ibagasen Bages Dèbata kalak i, itulasi kalak i ngo Jesus. Mersikusoon mo kalak i samahsa, "Bakunè ngo dok atèmu? Roh ma ngo ndia Ia mi pèsta èn?" **57** Ninganna bagidi enggo iperèntahken imam-imam ekuten dekket kalak Parisè mendokken; barang isè bettoh-bettohen idikè Jesus, kennah ibagahken, asa itangkup Ia.

**12:1** Ennem ari nai asa dapet Pèsta Paskah, laus mo Jesus mi Betania. I kuta i ngo merrian si Lazarus sienggo nung matè gabè ipegelluh Jesus nola. **2** Ijamu kalak i mo Ia i sidi. Si Marta pè dekket ngo merkebbas. Rebbak kundul ngo si Lazarus dekket Jesus mangan. **3** Nai roh mo si

Maria merembah minak narwatsu kira-kira sitengah litèr. Maharga kalohoon ngo minak i, nai iarirken mo minak i mi nèhè Jesus. Nai ilapui mo nèhè Jesus dekket bukna. Gabè baungkus mo bages i kumarnaken minak i. **4** Sada ipas sisiin i nai imo si Judas Iskariot simenelbuh Jesus mendokken -- **5** "Kasa oda idèa minak i merharga tellu ratus riar, asa iberrèken tokorna i mengurupi kalak sincor?" **6** Idokken si Judas pè bagidi, oda ngo kalak sincor nisarihkenna, tapi kerna pennangko ngo ia. Nggati ngo ibuat kèpèng i bagut-bagut nijèmakna idi nai, ai ia ngo memennep bagut-bagut i. **7** Tapi nina Jesus mo, "Belli mo ibaing bagidi, ai dosken solo-solo mi ari permatèngKu i ngo nibaingna i. **8** Dakdak ngo lot sincor i tengah-tengah ndènè." **9** Nterrem ngo kalak Jahudi mendengkoh, i Betania ngo Jesus, gabè laus mo kalak idi mi sisi, oda pellin kumarna Jesus, tapi dekket ngo naing mengidah si Lazarus sienggo nipegelluh Jesus i simatè nai. **10** Kumarnana idi ngo asa naing ibunuh imam-imam ekuten si Lazarus i; **11** ai kemulihkensa ngo, enggo mèduk kalak Jahudi percaya taba Jesus. **12** Sibarembenkenna nola, idengkoh jelma nterrem sienggo soh mi Jerusalem lako merpèsta Paskah idi mo enggo i tengah ndalan Jesus lako mi Jerusalem. **13** Nai ibuati kalak i mo ranting bak bulung kayu, nai laus mo kalak i mennimbak-nimbak Jesus ninganna mengoang-ngoangkan: "Hosianna, Poji mo Dèbata! Nipas-pasu mo Ia siroh merkitè-kitè gerar Tuhan i, Ipasu-pasu mo Raja kalak Israel!" **14** Nderrangna idi, enggo mo dapet Jesus sada kalodè bajar dèng, janah enggo mo kundul ia i babo kalodè i. Nai dapet mo bagè sitersurat ibas Bibèl: **15** "Ulang kono mbiar alè berru Sion! Tengen mo Rajami memmasang sada anak kalodè!" **16** Sinderrangna idi oda iarti sisiin Jesus dèng karinana i. Tapi enggo kessa ipesangap Jesus, merkitè kemmematèNa, gabè ièngèt kalak i mo kadè sinibaing ndèba tabaSa enggo tersurat ibas Bibèl tersèngèt diriNa. **17** Jelma silot rebbak dekket Jesus tikanna ipegelluh si Lazarus i simatè nai idi pè, dak ngo mennukutken pemmaing Jesus bai jelma nterrem i. **18** Kumarnana idi ngo asa merlausen kalak idi mendahi Jesus, kemmulihken tanda kellengangen nihanaken Jesus i. **19** Gabè nina Parisè mo samah-samahsa, "Oda lot nè kadè ndorok terbaing kita. Tengen mo, suberri dunia ngo mengèkutkensa!" **20** Kalak si roh merpèsta mi Jerusalem i, lot ngo

dèba kalak Junani. **21** Idahi kalak i mo si Pilipus, nina mo mbangsa, "Tuan sèkel ngo kami naing pejumpa dekket Jesus." (Si Pilipus imo asalna i Betsaida sini Galilea nai.) **22** Nai idahi si Pilipus mo si Andreas, ibagahken mo i tabasa. Jadi rebbak laus mo kalak i sidua magahken i mendahi Jesus. **23** Nai nina Jesus mo taba kalak i, "Enggo dapet tikkina, Anak Jelma i ipesangap. **24** Èngèt kènè mo mendè: Oda ganda pagè i ukum mak itanem mi tanoh i janah matè. Tapi enggo kessa matè ia, gabè mbuè mo buahna. **25** Barang isè mengkellini kessahna, kemmagoon kessah mo ia. Tapi barang isè menelkangken kessahna i dunia èn, ia ngo sipegelluhkensa soh mi kenggelluhen siamman-sumendah. **26** Barang isè naing mengkebasi Aku, kennah ièkutken ngo Aku, asa rebbak ia dekket Aku, barang i dikè pè Aku. Ai kalak simengèkutken Aku, gabè mersangap ngo ia ibaing Bapa." **27** "Mellui kalohoon ngo atèngKu, kadè mo ndia Kudokken? Kennah mo ndia Kudokken: Ialè Pa, ulang mo padiat Aku menggongken kinidersa ènda? Tapi tupèh kumarna lako menggongken kinidersa èn ngo Aku asa roh. **28** Ialè Pa, pessangap mo gerarMu!" Nai terdengkoh mo sora i sorga nai, "Enggo mo Kupesangap, janah pessangapenKu nola dèng ngo!" **29** Idengkoh jelma nterrem ni sidi ngo sora i, gabè nina kalak i mo, "Renggur ngo i." Lot ma ngo dèba mendokken, "Ah,oda! Malaèkat ngo mengeranai dekketSa!" **30** Nai nina Jesus mo taba kalak idi, "Ukum sora siterdengkoh i, oda ngo lako bangKu i asa terdengkoh, tapi lako bai ndènè ngo. **31** Enggo dapet tikkina ihukum dunia èn, janah bagèndari mo italuken berkuasa dunia èn. **32** Luas Enggo kessa ipedates Aku gabè kuabin mo karina jelma taba Aku." **33** Idokken pè bagidi, magahken bakunè carana Ia ipersilangken. **34** Nai nina jelma nterrem i mo tabaSa, "Mengèkutken Bukku Pati-patiin nami, nggelluh ngo Raja Sipaluah siniperbagah-bagah i soh mi amman-sumendah. Kasa gabè idokken Kono, kennah ipedates ngo Anak Jelma idi i tanoh èn? Isè ngo Anak Jelma i?" **35** Ialoi Jesus mo, "Sigejap nai ngo i tengah-tengah ndènè penendang i, merdalan mo kènè sidekkah nterrang dèng, asa ulang isangkemmi sigellap i kènè. Ai barang isè merdalan tikan gellap, oda ibettoh barang dampak dikè temburena. **36** Kepercayaan kènè mo penendang i, asa gabè dukak-dukak kecihuren i kènè." Enggo kessa idokken Jesus bagidi, laus mo Ia i sidi nai, janah oda

uè ia ntarar terridah bai kalak i. **37** Tukasi pè enggo matcam bagèna tanda kellengangen ihanaken Jesus, ipetengen-tengen kalak idi, tapi laju ngo oda percaya kalak i bana. **38** Asa merkitè bagidi, saut mo nidokken Nabi Jesaya: "Ialè Tuhan, isè mo percaya mi sukuten nami? Taba isè ngo ipacidah kuasa Tuhan i?" **39** Kumarna naidi ngo asa oda terbaing kalak i percaya, ai nina si Jesaya dèng ma ngo: **40** "Enggo kupepètung mata kalak i, janah enggo kupepihir ukur kalak idi; asa ulang merpendidah mata kalak i, janah asa ulang merpengantusi pikiren kalak i; asa ulang balik kalak i mendahi Aku, nai Kupemmalum mo kalak idi." **41** Idokken si Jesaya pè bagidi terrèngèt Jesus, kumarna enggo idah kemmuliaan Jesus i. **42** Tapi tukasi pè bagidi, mèduk ngo pengulu-pengulu kalak Jahudi percaya taba Jesus, tapi oda pang kalak i mengaku i sintarar, asa ulang iliplit kalak idi, ipas agama nai, ai mbiar ngo kalak i midah penguasa-penguasa kalak Jahudi. **43** Ai lotiin ngo kalak i ipoji jelma daripada terrolih pemmojiin bai Dèbata nai. **44** Nai ipegang Jesus mo sorana, "Barang isè percaya taba Aku, oda ngo pellin taba Aku ia percaya, tapi deket ngo Ia percaya taba sipasulakken Aku. **45** Janah barang isè mengidah Aku, mengidah sipasulakken Aku ngo Ia. **46** Roh Aku mi dunia èn, tosè bagè penendang, asa karina sipercaya taba Aku ulang merrian ibagasen sigellap. **47** Barang isè mendengkohken peddahKu tapi oda iulaken -- oda ngo Aku menghukumsa. Ai roh Aku oda ngo lako menghukum dunia èn, tapi lako paluahkensa ngo. **48** Ai barang isè menulak Aku janah oda menguèi katangKu, enggo lot simenghukumsa, imo kata sienggo Kuruapken i; **49** oda ngo ibas atè-atèngKu nai, tapi Bapa simengutus Aku ingo mendokken kadè sipatut dokkenkenKu. **50** Janah kenggeluhen ngo kataNa i. Asa, karinana siKuruapken i, tosè ngo i mi sinidokken Bapa mahan ruapenkenKu."

**13:1** Sidari nai asa dung Ari Raya Paskah i, enggo ibettah Jesus dapet mo tikkina, Itadingken mo dunia èn lako balik mendahi BapaNa. Enggo mo Ikekellengi karina sitersoh baNa i dunia èn, janah soh mi puncana dak ikekelengi ngo kalak idi. **2** Tupung mo mangan Jesus bak sisinNa cibonna i. Ukum atè si Judas Iskariot, enggo mo ibengketti sibolis, janah enggo mo

iniatkan lako menelbuh Jesus. **3** Ibettoh Jesus ngo nemmu enggo ipesakat Bapana tabaSa kuasa. Ibettoh ma ngo bai Dèbata nai ngo rohna Ia, janah kennah balik mi Dèbata. **4** Kerna naidi cènder mo Ia, italkasi mo jubahNa, nai iabitken mo bèsahen mi abakNa. **5** Nai iarirken mo laè mi sambung, Iborih mo nèhè sisinNa i, janah ilap dekket bèsahen niabitkenNa i. **6** Soh kessa mo Ia taba si Simon Petrus, mèter idokken si Simon Petrus mo, "Tuhan, mèter patut mo kono memmorih nèhèngku?" **7** Ialoi Jesus mo, "Ukum bagèndari oda ngo iantusi kono dèng siKubakin èn, luas pè asa iarti kono i." **8** "Ulang mo alè Tuhan," nina si Petrus taba Jesus. "Barang bakunè pè, ulang mo gabè Tuhan i nola morih nèhèngku!" Tapi nina Jesus mo mbangsa, "Mula oda Kuborih nènèmu, oda lot perdemuunmu dekket Aku." **9** Ialoi si Simon Petrus mo, "Mula bagidi ngo Tuhan, ulang mo pellin nèhèngku sambing iborih kono, tapi dekket mo bak takalku!" **10** "Ukum kalak sienggo merridi, enggo mo mpanting i karina. Oda perlu nèngè ia kennah iborih, pellin nèhèna nai ngo kessa perlu iborih asa mpanting. Enggo mo mpanting kènè, tapi oda ngo karinana kènè," nina Jesus. **11** (Ai enggo ngo ibettoh Jesus isè naing menelbuhSa. Kernanaidi ngo asa idokken, "Enggo ngo mpanting kènè, tapi oda karinana.") **12** Enggo kessa pul iborih Jesus nèhè kalak idi, Ipakkè nola mo jubahNa kin, nai kundul mo ia. Nai idokken mo taba kalak I, "Iantusi kènè ngo kadè lapaten siKubaing ndai bai ndènè? **13** Idokken kènè ngo Aku Guru janah Tuhan, tuhu ngo i; ai Guru janah Tuhan ngo Aku. **14** Mula Aku ngo Tuhan janah Guru ndènè memmorih nèhè ndènè, kènèpè patut ngo mersiborihen nèhè. **15** Kubaingken codiin idi bai ndènè, asa samah-samah kènè pè mencodi bagè sienggo Kubaingken i taba kènè. **16** Èngèt kènè mo èn: Oda ngo belgahen hamba asa tuanna; janah oda ngo belgahen pasulaken dari pada sipasulakken. **17** Enggo ibettoh kènè i bagèndari; mula ibaingken kènè bagidi, tuhu-tuhu mo kènè mersampang atè. **18** Karina siKudokken èn taba kènè, oda ngo bai ndènè karinana i, ai Kubettoh ngo barang isè siKupilih. Tapi barang kadè sitersurat ibas Bibèl, kennah saut ngo i karinana, janah èn mo sitersurat i sidi, 'Kalak sirebbak mangan dekket Aku ngo mengalo Aku.' **19** Kubagahken i bai ndènè bagèndari, sinderrang madèng masa, asa enggo kessa masa idi, gabè percaya mo kènè, Aku ngo

i sinidokkenna AKU LOT. **20** Situhunna ngo siKudokken èn: Barang isè menjalo pasulakenKu, Aku ngo nijalona i. Janah barang isè menjalo Aku, Dèbata sipasulakken Aku i ngo nijalona." **21** Idokken Jesus kessa mo bagidi, gabè mellui kalohoon mo atèna. Nai idokken mo, "Situhunna ngo siKudokken ènda; sada kalak bai ndènè nai ngo menelbuh Aku." **22** Mersitengennen mo sisinNa i samahsa ninganna ibagasen perasaan oda mertentu. Oda ibettoh kalak idi, isè nimaksud Jesus i. **23** Kundul ngo sisiin kekellengen atè Jesus i gembarna. **24** Nai ia mo ikilap si Simon Petrus, asa ikusoken taba Jesus, tah siapaina nimaksud Jesus i. **25** Nai ijolmiti mo Jesus, ikuso mo, "Isè ngo i Tuhan?" **26** Ialoi Jesus mo, "Barang bai isè Kuberrèken roti siKusernepken èn, idi mo ia kalakna." Nai ibuat Jesus mo sada roti, isernepken mo mi bagasen caban; iberrèken mo roti i taba si Judas Iskariot. **27** Ijalo si Judas kessa mo roti i, mèter mbengket mo Sibolis mi bagasen dirina. Idokken Jesus mo tabasa, "Ndor mo bahan sinaing bahankenmu i!" **28** Isè poda kalak i simangan i mengantusi, kasa idokken Jesus bagidi taba si Judas. **29** Lot ngo dèba merdokatè, ipasulak Jesus si Judas lako mennokor siperlu mi pèsta idi, barang tah ipasulak Jesus ia mennaruhken kèpèng giam cituk taba kalak sincor, ai ia ngo mencèkèp bagut-bagut kalak idi. **30** Enggo kessa ijalo si Judas roti i, mèter laus mo ia mi ruar, tapi enggo mo berngin tikanna i. **31** Enggo kessa laus si Judas i, idokken Jesus mo, "Bagèndari mo mersangap Anak Jelma i. Janah merkitè-kitè Ia, mersangap ma mo Dèbata. **32** Mula mersangap Dèbata merkitè-kitè Ia, Ia pè ipesangap Dèbata ma mo. Ndor nèngè mo i, ibakin Dèbata. **33** Kènè dukak-dukakKu, oda ndekkah nèngè rebbak Aku dekket kènè, itulusi kènè mo Aku, tapi bagè sienggo Kudokken taba kalak Jahudi, bagidi ma ngo Kudokken taba kènè: Oda terdahi kènè mi bekkas sidahinKu i. **34** Jalo kènè mo pati-patiin rembaru bangKu nai: Kennah mersikekelengen ngo kènè samah kènè. Bagè Aku mengkekelengi kènè, bagidi ma mo kènè kennah mersikekelengen. **35** Mula mersikekelengen kènè, samah kènè, karina mo kalak bettohen magahken sisinKu kènè." **36** Ikusoken si Petrus mo, "Tuhan, naing laus mikè ko pana?" Nina Jesus mengaloi, "Naing laus ngo Aku mi sada bekkas, tapi oda terbaing kono mengèkutken Aku mi bekkas i. Tapi ukum luas, ièkutken kono mo Aku mi

sidi." **37** "O Tuhan, kasa oda ndorok kuèkutken kono bagèndari? Ai kebbas ngo aku lako matè pè, mengèkutken kono!" nina si Petrus. **38** Ialoi Jesus mo, "Tuhu-tuhu ngo matè pè uè ngo ko lako megèkutken Aku? Kubegahken mo bamu: Sinderrang madèng takuak manuk berngin èn, enggo mo tellu kali iperso kono Aku, oda itandai kono nimu Aku!"

**14:1** "Ulang pella bonek atè ndènè," nina Jesus taba kalak i. "Percaya mo kènè taba Dèbata, janah percaya ma mo kènè taba Aku. **2** Lumbang ngo bekkas i Bages Bapa. Laus pè aku mi sidi lako menghantari bekkas ndènè ngo. Oda pella kubegahken idi taba kènè, ukum oda ngo tuhu bagidi. **3** Enggo kessa laus Aku menghantari bekkas bai ndènè, roh nola ngo Aku mengalengi kènè; asa barang i dikè Aku merbekkas, i sidi ma mo kènè merrian. **4** Ibettoh kènè ngo dalan mi bekkas sinaing dahinKu idi." **5** Gabè idokken si Tomas mo mbang Jesus, "Tuhan, oda ngo kubettoh kami barang dampak dikè kono laus, bakunè mo kami memettoh dalan laus mi sidi?" **6** Ialoi Jesus mo, "Aku ngo dalan lako menandai Dèbata, dekket dalan asa terolih kenggeluhen. Sada poda ndorok soh mendahi Bapa, ukum mak merkitè-kitè Aku. **7** Mula itandai kènè Aku, itandai kènè ma mo BapangKu. Mulai bagèndari nai, enggo mo itandai kènè Ia, janah enggo mengidah Ia." **8** Nai idokken si Pilipus mo taba Jesus, "Tuhan, tuduhkan bai nami Bapa i, asa puas ukur nami." **9** Tapi ialoi Jesus mo, "Enggo mo bagi dekkahna Aku rebbak dekket kènè, laju dèng ngo keppè oda itandai kono Aku alè Pilipus? Barang isè mengidah Aku, mengidah Bapa i ngo Ia. Kasa idokken kono dèng, 'Tuduhkan Bapa i bai nami?' **10** Oda ngo percaya kono alè Pilipus, sada ngo Aku dekket Bapa, janah sada ngo Bapa dekket Aku? Karina siKudokken taba kono i, oda ngo tubuh ibas ukur-ukurKu nai i. Bapa nibagasen Aku i ngo mendokken i karinana. **11** Percaya mo kènè, sada ngo Aku dekket Bapa, janah sada ngo Bapa dekket Aku. Mula oda terbaing kènè mengkettoki idi, ah, mak nèngè! Percaya mo kènè taba Aku, Kumarnaken sienggo Kuhanaken i. **12** Situhunna ngo siKudokken èn: Barang isè tuhu-tuhu percaya taba Aku, bakinenna ngo bagè sienggo Kubakin i -- oda pelliin bagi sambing tupèh -- tapi buèn i sidi nai pè ndorok ngo ibaing, kumarna laus ngo Aku mendahi

Bapa. **13** Asa barang kadè saming ipido kènè merkitè-kitè gerarKu, Kuberrèken ngo i bai ndènè, asa mermulia Bapa merkitè-kitè Anak i. **14** Pido kènè mo barang kadè merkitè-kitè gerarKu; Kuberrèken ngo i bai ndènè." **15** "Mula ngkelleng atè ndènè midah Aku, ulaken kènè mo pati-patinKu. **16** Kupido mo bai Bapa, asa Iberrèken bai ndènè sada Pengurupi sidèban, simerian rebbak dekket kènè soh mi amman sumendah. **17** Tendi Dèbata ngo Ia sipetararken kebennaren tersèngèt Dèbata. Oda terjalo dunia èn Tendi Perbadia I, kerna oda idah dunia èn bak oda itandai dunia èn ia. Tapi itandai kènè ngo ia, kerna merrian rebbak dekket kènè ngo Ia, janah mersada dekket kènè mo Ia. **18** Oda Kutadingken kènè mak merinang bak mak merbapa. Balik nola ngo Aku mendahi kènè. **19** Sigejap nai ngo, oda idahen dunia èn nèngè Aku. Tapi idah kènè nola mo Aku. Janah kumarna nggelluh ngo Aku, kènè pè nggelluh ngo. **20** Enggo kessa dapet arina, bettohen ndènè mo, sada ngo Aku dekket Bapa i, janah kènè sada ngo dekket Aku, janah Aku pè sada ma ngo dekket kènè. **21** Barang isè menjalo janah mengulaken katangKu, ia ngo simerkelleng atè midah Aku. Ngkelleng mo atè BapangKu midah simengkekelengi Aku. Aku pè ngkelleng mo atèngKu midahsa, janah kupetandaken diringKu bana." **22** Mengkuso mo si Judas (oda si Judas Iskariot) taba Jesus, "Tuhan, kasa taba kami ipetandaken kono diriMu, keppè oda taba dunia èn?" **23** Ialoi Jesus mo, "Barang isè ngkelleng atèna midah Aku, iuèi mo peddahKu. Ngkelleng mo atè BapangKu midahsa. Nai roh mo Bapa rebbak dekket Aku mendahisa, janah merrian mo kami rebbak dekketsa. **24** Barang isè oda mengkekelengi Aku, itulak ngo peddahKu. Oda ngo bangku nai peddah nidengkoh ndènè i, tapi peddah Bapa sipasulakken Aku i ngo. **25** Kubagahken i karina taba kènè, sinderrang rebbak dèng Aku dekket kènè. **26** Tapi Tendi Dèbata i, pengurupi sinipasulak Bapa merkitè gerarku, ia mo mengajarken taba kènè tersèngèt mi sagumama dekket pessèngètken taba kènè tersèngèt karinana sienggo Kugabahken idi bai ndènè. **27** Damè ngo Kutadingken bai ndènè, imo damè silot bangku Kuberrèken bai ndènè. Oda ngo bagè niberrèken dunia èn ukum damè siKuberrèken i. Ulang kènè bulisah janah ulang mbiar. **28** Enggo idengkoh kènè siKudokken i, 'Laus mo Aku, tapi roh nola ngo Aku mendahi kènè'. Mula tuhu ngkelleng atè

ndènè midah Aku, kennah lolo ngo kènè mula laus Aku mendahi Bapa, ai belgahen ngo Bapa i asa Aku. **29** Kubagahken kin i bagèndari taba kènè sinderrang madèng masa i karina, asa enggo kessa masa, gabè percaya mo kènè. **30** Oda pella mbuè nèngè sinaing dokkenkenKu taba kènè, kerna enggo katikana roh penguasa dunia èn. Tapi oda ngo merkuasa ia bangKu. **31** Tapi kennah masa ngo i karina asa ibettoh dunia èn, ngkelleng ngo atèngKu midah Bapa, janah kuulaken karinana sinidokken Bapa i taba Aku. Ita kènè mo, laus mo kita isèn nai."

**15:1** Nina Jesus dèng ma, "Aku ngo batang anggur situhunna, Bapa ngo sidasa pekken i. **2** Karina dahanKu siso merbuah igettap ngo; tapi karina dahan simerbuah, itunasi ngo janah ipebersih asa makin ratraten buahna. **3** Enggo mpanting kènè kumarna peddah siKupeddahken i bai ndènè. **4** Tettap mo kènè ibagasen Aku, asa Aku pè tettap ibagasen kènè. Oda ndorok merbuah dahan i ukum ibas kedirinna nai. Tapi ndorok merbuah ngo ia, mula nggelluh ia ipas batang idi. Bagidi ma ngo bang kènè pè, lebbè nggelluh ibagasen Aku ngo kènè, asa ndorok merbuah kènè. **5** Aku ngo batang anggur i, janah kènè ngo dahan-dahanna. Barang isè nggelluh ibagasen Aku, janah Aku ibagasensa, ia ngo merbuahken mbuè; ai ukum mak merkitè-kitèken Aku, oda lot terbahan kènè barang kadè pè. **6** Barang isè oda nggelluh ia ibagasen Aku, igettap ngo ia janah ipatakken, nai gabè ngkerrah-kerring mo ia janah ipinumpukken mo asa itutungi mi api. **7** Mula nggelluh kènè ibagasen Aku janah dak iulaken kènè peddahKu, ndorok mo kènè mengido barang kadè saming taba Bapa, nai iberrèken mo sinipido ndènè i. **8** Mula ratraten buah ndènè mersampang atè mo BapangKu, imo tandana tuhu-tuhu kènè sisinKu. **9** Kukekelengi ngo kènè bagè Bapa mengkekelengi Aku. Hot mo kènè mbagasen kelleng atèngKu i. **10** Mula iuèi kènè katangKu, nggelluh ibagasen Aku mo kènè, codi bagè Aku nggelluh ibagasen ngkelleng atè BapangKu, kerna kuuèi kataNa." **11** "Karinana Kubagahken i taba kènè, asa irasaken kènè sampang atèngKu, janah asa dom sampang atè ndènè. **12** Èn mo peddahKu: Kennah mersikekelengen kènè, codi bagè Aku mengkekelengi kènè. **13** Barang isè mengkekelengi denganna, kennah uè ia matè mengkepkep denganna i. **14**

Mula iulaken kènè siKudokken, denganKu janah supan-sulanKu mo kènè. **15** Oda nèngè Kugerari kènè kandu, ai oda ibettoh kandu barang kadè ibahan tuanna. Kugerari mo kènè supan-supanKu, kerna karina siKudengkoh bai Bapa nai, enggo mo Kubagahken taba kènè. **16** Oda ngo kènè memilih Aku. Aku ngo milih kènè, janah mennuruh kènè, asa laus kènè merbuah -- asa ratraten buah ndènè, janah asa hot buah ndènè i. Nai iberrèken Bapa mo bai ndènè barang kadè saming ipido kènè merkitè-kitè Aku. **17** Èn mo peddahKu: Kennah mersikekelengen kènè." **18** "Mula ncego atè dunia èn midah kènè, èngèt kènè mo, enggo lebbèen kin Aku ikecegoken. **19** Ukum dunia èn kin sidasa kènè, ngkelleng ngo atè dunia èn midah kènè, janah gabè supan-supanna ngo kènè. Tapi enggo Kupilih kènè i dunia èn nai, jadi oda nèngè milik dunia èn kènè. Kumarnakenna i ngo asa ceggo atè dunia èn midah kènè. **20** Èngèt kènè mo sienggo Kudokken idi taba kènè, 'Oda ngo belgahen kandu daripada tuanna.' Salang Aku enggo idersa kalak idi, makinsa nola mo kènè mak idersa. Mula iuèi kalak i peddahKu, iuèi ma ngo bang peddah ndènè pè. **21** Iulaken kalak i ngo karinana i taba kènè, kumarnaken sisinKu kènè; janah kumarna oda itandai kalak idi Ia simengutus Aku. **22** Ukum oda kin roh Aku, janah mula oda kin sanga kupeddahken karinana i taba kalak idi, oda ngo merdosa kalak i. **23** Barang isè mercegggo atè midah Aku, ceggo ma mo atèna midah Bapa. **24** Ukum oda dèng kin nung Kuhanaken i tengah-tengah kalak i siso nung ihanaken barang isè pè, oda ngo merdosa kalak idi. Tapi bagèndari enggo mo idah kalak i kadè siKuhanaken, tapi ncego ngo atè kalak i midah Aku, bang midah BapangKu pè. **25** Masa pè karinana i, asa dapet ngo bagè sittersurat ibas Bukku Patiin kalak i, 'Ikecegoken kalak i ngo Aku, oda lot sebabna.' **26** Pasulakenku mo taba kènè Pengurupi siroh bai Bapa i nai. Ia ngo Tendi sipetandaken kebennaren terrèngèt Dèbata. Roh kessa Ia, Isaksiken ngo terrèngèt Aku. **27** Tapi kènè pè kennah ngo mennaksiken Aku, ai imulana nai ngo kènè enggo rebbak dekket Aku.

**16:1** Kubagahken kin i lebbèen taba kènè, asa ulang gabè murak ukur ndènè. **2** Iliplip kalak i mo kènè i bages perguruun nai. Janah dapet nèngè mo tikkina, mengulaken lemmo atè Dèbata ngo ia dok atèna mula ibunuh

kalak idi kènè. **3** Ibaing kalak i bai ndènè bagidi, kumarna oda itandai kalak i dèng BapangKu, janah Aku pè makdèng ma ngo itandai. **4** Tapi bagèndari Kubagahken idi taba kènè, asa mula masa i luas, èngèt kènè mo, enggo Kubagahken kin taba kènè." "Oda nung dèng Kubagahken idi i mulana nai taba kènè, kumarna rebbak dèng Aku dekket kènè. **5** Tapi ukum bagèndari laus nè mo Aku mendahi simengutus Aku; tukasi pè bagidi, sada kalak poda kènè mengkuso, dampak dikè Aku laus. **6** Bagèndari balikna nola ngo tupèh, ai gabè bonek nola ngo atè ndènè, kumarna Kubagahken idi taba kènè. **7** Tapi situhunna ngo siKudokken èn bai ndènè: Laba ndènè ngo mula laus Aku; ai ukum oda laus Aku, oda roh pengondiin i mendahi kènè. Tapi mula laus Aku, pasulakenKu mo Ia mendahi kènè. **8** Janah roh kessa Ia, Iajari mo dunia èn tersèngèt pengantusiin lapaten dosa, kebennaren dekket hukum; **9** ukum tersèngèt dosa, imo kumarna oda percaya kalak i bangKu; **10** ukum tersèngèt kebennaren, imo kumarna laus Aku mendahi Bapa, janah oda idah kènè nèngè Aku; **11** ukum tersèngèt hukum, imo enggo ihukum penguasa dunia enda! **12** Macam dèng ngo nemmu bagèna sinaing Kubagahken bai ndènè, tapi ukum bagèndari oda dèng terjalo kènè i. **13** Tapi mula enggo kessa roh Tendi i, imo Ia sipetandaken kebennaren tersèngèt Dèbata, itegu-tegu mo kènè lako menandai karina kebennaren. Oda ngo mengerrana Ia ibas diriNa sendiri nai, tapi iranaken ngo sinidengkohNa, janah bagahenkenna ma ngo taba kènè sinaing masa i podi ari. **14** Ipessangap ngo Aku, ai bagahenkenNa ngo taba kènè kadè sinijaloNa bangKu nai. **15** Karinana silot bai Bapa, milikNa ngo Kumarna naidi ngo asa Kudokken; bagahenken Tendi i ngo bai ndènè, kadè nijaloNa bangKu nai." **16** "Sigejap nai ngo kessa, oda idahen ndènè nèngè Aku, tapi sigejap nai nola ma, idahen ndènè nola ma mo Aku." **17** Mendengkoh idi, gabè mersikusoon mo dèba sisiin idi samahsa, "Kadè ngo lapaten sinidokkenna banta i; sigejap nai ngo kessa, oda idahen ndènè nèngè Aku, tapi sigejap nai nola ma, idahen ndènè nola mo Aku? Bagidi mo dekket nidokkenna: 'Laus mo aku mendahi Bapa?' **18** Dak ngo ikusoken kalak i: Kadè lapaten 'sigejap nai'? Oda siantusi tah kadè ranana!" **19** Ibettoh Jesus mo naing ikusoi kalak idi Ia, jadi Idokken mo taba kalak i, "Kasa mersikusoon kènè

samah-samah kènè terrèngèt siKudokken: Sigejap nai ngo, oda idahen ndènè nèngè Aku, tapi sigejap nai nola ma, idahen ndènè nola mo Aku? **20** Ntangkas mo kubagahken taba kènè; tangis mo kènè janah derru-derru, tapi lolo mo dunia èn. Bonek ngo kènè, tapi gabè mobah mo bonek atè ndènè i gabè sampang atè. **21** Susah janah bonek ngo atè daberru lako menubuhkan dukakna. Tapi enggo kessa tubuh dukakna i, gabè oda nèngè ngo ièngèt kinimpiahna i, ai mersampang atè mo ia kerna enggo itubuhkan sada anak mbara mi dunia èn. **22** Bagidi ma ngo bang kènè pè. Bagèndari bonek ngo kènè, tapi rebbak nola mo Aku dekket kènè, nai gabè sampang mo atè ndènè; janah isè poda ndorok mengerampasi sampang atè ndènè i bai ndènè nai. **23** Dapet kessa mo ari i, oda pella mengkusoken barang kadè nèngè kènè taba Aku. Kudokken mo bai ndènè: Barang kadè pè ipido kènè bai Bapa nai, iberrè ngo i bai ndènè merkitè-kitè gerarKu. **24** Soh bagèndari oda nung dèng kènè mengido barang kadè merkitè gerarKu. Pengido kènè mo, asa menjalo kènè, janah asa dom sampang atè ndènè." **25** "Karinana ènda Kuranaken bai ndènè merkitè-kitè codiin. Tapi roh nè mo tikkina, oda nèngè merkitè codiin Aku mengerrana taba kènè. Ntompel mo kuranaken bai ndènè tersèngèt Bapa. **26** Tikan dapet ari i, mersodip mo kènè merkitè gerarKu mendahi Bapa lako bai ndènè, **27** ai ngkelleng ngo atè Bapa midah kènè, kumarna ngkelleng atè ndènè midah Aku. **28** Bai Bapa nai ngo asalKu roh mi dunia èn. Tapi laus mo Aku menadingken dunia èn, lako balik mendahi Bapa." **29** Nai nina sisiin i mo taba Jesus, "Bagèndari dèng ngo asa ntompel iranaken kono bai nami, oda nèngè merkitè codiin. **30** Bagèndari enggo kubettoh kami, ibettoh kono ngo karinana, janah oda pella mengkuso nèngè kalak i mendahi kono. Kerna naidi, percaya ngo kami bai Dèbata nai ngo rohmu." **31** Nai nina Jesus mo taba kalak i, "Bagèndari otang enggo percaya kènè? **32** Èngèt kènè mo! Roh mo tikkina enggo mo roh i tupèh, isamburiahken mo kènè. Laus mo kènè balik mi bages ndènè gennep janah itadingken kènè mo sadaKu. Tapi oda ngo sadaKu tupèh, ai Bapa i ngo denganKu. **33** Karina i Kubagahken taba kènè, asa dom sampang atè ndènè, kumarna nggelluh kènè ibagasen Aku. Mpersuk mo iakap kènè ibakin dunia èn. Tapi tahanken kènè mo i sigejap, ai enggo kutaluken dunia èn!"

**17:1** Enggo kessa idokken Jesus bagidi, itarè mo mi langit ninganna idokken, "Ialè Pa enggo dapet tikkina bagèndari pesangap mo anakMu, asa ipesangap anakMu i Kono. **2** Tosè bagè Kono enggo merrèken kuasa taba Anak idi tersèngèt karina jelma singgelluh, asa Iberrèken Anak I kenggelluhen siamman sumendah taba karina jelma siniberrèkenMu i bana. **3** Èn ngo kenggelluhen situhunna janah siamman sumendah i, asa itandai kalak i, Kono ngo kessa Dèbata situhunna, dekket menandai Jesus Kristus Raja Sipaluah sini utusMu i alè Pa. **4** Enggo Kupesangap Ko alè Pa i babo tanoh èn merkitè enggo pul Kubakin karina bahaan nidokkenMu idi mahan bahanKu. **5** Kumarna naidi alè Pa, persangapi mo Aku bagèndari merkitè kemmuliaan sienggo Kurasai rebbak dekket Kono idi kin sinderrang makdèng ihanaken Kono dunia èn. **6** Enggo kupetarar gerarMu alè Pa taba jelma niberrèkenMu bangKu i dunia èn. Ko ngo sidasa kalak idi, janah enggo ipesakat Kono kalak i taba Aku. Enggo mo iuèi kalak i peddahMu i alè Pa. **7** Bagèndari ibettoh kalak i ngo enggo, karinana niberrèkenMu bangKu, Kono ngo sidasa i. **8** Karina rana sinidokkenMu taba Aku, enggo Kupessoh taba kalak i, janah enggo mo ijalo kalak idi. Enggo ngo ntangkas ibettoh kalak idi, berkat bamu nai ngo Aku, janah percaya ngo kalak i, Kono ngo pasulakken Aku. **9** Kalak i ngo Kusodipken, oda ngo dunia èn, tapi kalak i sienggo nipesakatmu bangKu idi ngo Kusodipken, ai Kono ngo sidasa kalak i. **10** Karina milikKu, milik Bapa ngo i, janah karina milik Bapa, milikKu ngo i, janah mersangap ngo Aku i tengah-tengah kalak idi. **11** Naing roh ngo Aku bagèndari mendahi Kono alè Pa. Oda i dunia èn nèngè Aku, tapi ukum kalak idi dak i dunia èn ngo tong. Ialè Bapa Simbadia, permakani mo kalak idi ibagasen gerarMu, imo kuasaMu sienggo niberrèkenMu bangKu -- asa sada kalak idi bagè kita sisada i. **12** Sidekkah rebbak dèng Aku dekket kalak i, Kupermakani ngo kalak idi ibagasen gerarMu -- imo merkitè kuasaMu niberrèkenMu bangKu. Enggo kujaga kalak i siniberrèkenMu bangku i, janah sada kalak poda lot mbalang kubakin, laènken sisada kalak sienggo nitentukanmu lako mago i, asa merkitè bagidi saut bagè sitersurat ibas Bibèl. **13** Bagèndari roh mo Aku mendahi Kono alè Pa. Kudokken karinana i taba Kono, sinderrang i dunia èn dèng Aku; asa dom sampang atèngKu ibagasen kalak

i. **14** Enggo Kupesakat karina peddahMu i taba kalak i, janah ikosomi dunia èn ngo kalak i, kumarna oda milik dunia èn kalak i, tosè bagè Aku oda milik dunia èn. **15** Oda ngo Kupidoken asa iabin Kono kalak idi i dunia èn nai tapi Kupidoken asa ilegenni Kono kalak idi ibas si jahat i nai. **16** Tosè bagè Aku oda i dunia èn nai, bagi ma ngo bang kalak idi pè oda i dunia èn nai. **17** Perbadia mo kalak idi i bagasen kebennarenMu, ai kataMu ngo kebennaren. **18** Tosè bagè niutusMu Aku mi dunia èn, bagi ma ngo Kupasulak kalak i mi dunia èn, **19** janah mahan tebbus kalak idi Kuberrèken ngo diringKu taba Kono alè Pa, asa tuhu-tuhu kalak idi bagè nipilih baMu. **20** Oda ngo pellin bai kalak i saming Aku mersodip, tapi dekket ngo taba kalak sipercaya bangKu, kemmulihken sukuten kalak idi, **21** asa gabè sisada kalak i karina, tosè bagè Kono ibagasen Aku, janah Aku ibagasen Kono, janah kalak idi sada ibagasen kita, asa percaya dunia èn, Kono ngo mengutus Aku. **22** Enggo Kupersangapi kalak i merkitè kesangapen niberrèkenMu bangKu, asa merkitè bagidi, gabè sada kalak i, **23** tosè bagè kono pè sada dekket Aku, asa tuhu-tuhu kalak i sada, nai kemmulihkenna idi, gabè satdar dunia èn, Kono ngo alè Pa mengutus Aku, janah ngkelleng ngo atèMu midah kalak i, bagè ngkelleng atèMu midah Aku. **24** Ialè Pa, enggo ipesakat kono kalak i bangKu. Bagèndari pè, ipergeddo atèngKu, barang idikè pè Aku, dak rebbak nemmu kalak i dekket Aku, asa idah kalak i kemmulianKu; imo kemmuliaan niberrèkenMu bangKu, kumarna ikekelengi Kono ngo Aku, madèngkin pè ihanaken Kono dunia èn. **25** Alè Pa, Kono ngo sintèger i. Oda ngo itandai dunia èn Kono, tapi ukum Aku kutandai ngo Kono, janah ibettoh kalak èn ngo, Kono ngo mengutus Aku. **26** Enggo Kupetandaken Kono alè Pa taba kalak i, janah dak bagidi ngo Kubaing, asa ndorok irasaken kalak i, ngkelleng ngo atèmu midah Aku."

**18:1** Enggo kessa pul isodipken Jesus bagidi, laus mo Ia rebbak dekket sisinNa mi suberrang Laè Kidron. Lot ngo isidi pekken. Misidi mo Jesus rebbak dekket sisinNa. **2** Ukum si Judas penelbuh idi, ibettoh ngo i bekkas i, ai nggati ngo Jesus mi sidi pulung dekket sisinNa. **3** Nai laus mo si Judas mi bekkas i menguluken sada nuhnuhen tenterra Rom bak perjaga Bages

Dèbata, ipasulak imam-imam ekuten bak kalak Parisè. Lengkap ngo kalak i merembah senjata, suluh bak obor. **4** Ibettoh Jesus ngo karina sinaing masa baNa. Nai Idapetken mo kalak i ninganna idokken, "Isè ngo tulusen ndènè?" **5** Ialoi kalak i mo, "Jesus kalak Nazaret i ngo." "Aku ngo I," nina Jesus taba kalak i. Isidi ma ngo si Judas penelbuh i cènder rebbak dekket kalak i. **6** Sinderrang idokken Jesus taba kalak i, "Aku ngo I," mèter sondar mo karina kalak i mi podi, janah mertonggalingen mi tanoh. **7** Nai idokken Jesus mo mengolihi, "Isè ngo tulusen ndènè?" "Jesus kalak Nazaret i ngo," nina kalak i mengaloi. **8** "Enggo Kudokken taba kènè Aku ngo I," nina Jesus. "Asa mula Aku ngo sinitulusen ndènè, belli kènè mo kalak èn laus." **9** (Merkitè katana bagidi, saut mo nidokkenna i bagèen, "Alè Pa, isè poda lot mago Kubaing ibas sienggo nipessohMu mbang Aku i nai.") **10** Nai mènter isintak si Petrus mo pedangna, ai tupung kin ngo ia merpeddang, itampul mo sada kalak naposo imam huntuun, sanga nggettap copingna kamuhun. Si Malkus ngo gerar naposo imam huntuun i. **11** Nai idokken Jesus mo taba si Petrus, "Sembungkan pedangmi! Otang kennah ngo Kuènum caban kinidersa niberrèken Bapa bangKu?" **12** Nai mènter itangkup soridadu bak ekutenna dekket perjaga-perjaga kalak Jahudi mo Jesus, janah ilanggu. **13** Iiring kalak i mo Jesus perlebbè mendahi si Hanas, simatua si Kayafas. Si Kayafas ngo imam huntuun tahun naidi. **14** Ia ngo simendokken taba perkuasa Jahudi, lotiin ngo matè sada kalak megkepkep jelma nterrem, dari pada karinana nola tumpat bangsa i. **15** Ukum si Simon Petrus dekket sisiin sisada kalak nai, dak ièkut-èkut ngo Jesus i podi nai. Mersitandaan ngo sisiin sisada kalak i dekket imam huntuun i; jadi dekket ngo ia mbengket rebbak dekket Jesus mi kasèan bages imam huntuun i, **16** tapi ukum si Petrus i ruar ngo ia memèma, i pèntu. Balik mo mi ruar sisiin sisada kalak i, simersitandan dekket imam huntuun i. Mengerranai mo ia dekket naposo daberru penjaga pèntu, nai iarahken mo si Petrus mbengket mi bagasen. **17** Nai nina daberru simenjaga pèntu i mo mbang si Petrus, "Èi, otang kono pè sada kalak ipas sisiin kalak adoi nai ngo?" Ialoi si Petrus mo, "Oda!" **18** Kumarna enggo mbergoh kalohoon tikanna idi, gabè ilakati naposo dekket perjaga-perjaga Bages Dèbata mo api, nai cingko mo kalak i cidudu i

gambar api i. Si Petrus pè dekket ma mo cènder i sidi cidudu. **19** Nai ikusoi imam huntun imo Jesus tersèngèt sisinNa bak tersèngèt peddahNa i. **20** Ialoi Jesus mo, "Dakdak ngo Aku mengajari jelma nterrem i bages perguruun dekket i Bages Dèbata bekkas kalak Jahudi mertumpu. Oda Aku mboni-mboni mengerana. **21** Kasa Aku ikusoi kono? Kalak idi sienggo mendengkoh peddahKu i mo kusoi, ai enggo ntangkas ibettoh kalak i siKupeddahken idi." **22** Enggo kessa idokken Jesus bagidi, mèter iparap sada kalak perjaga ni sidi mo Jesus ninganNa idokken, "Kasa bagidi pengaloiMu taba imam huntun i?" **23** Nai ialoi Jesus mo ia, "Mula salah siKudokken i, bagahken salahna. Tapi mula tuhu ngo siKudokken i, kasa iparap kono Aku?" **24** Nai ipasulak si Hanas mo mengiring Jesus mendahi si Kayafas imam huntun i, tapi tong dèng ngo terlanggu. **25** Ukum si Simon Petrus, tong dèng ngo cènder i sidi cidudu. Nai nina jelma nisidi mo mbangsa, "Otang kono pè sada kalak ipas sisinna i nai ma ngo?" Tapi iperso si Petrus ngo, nina mo, "Oda!" **26** Nai nina sada kalak ipas naposo imam huntun i idi nai mo, imo sincelket si nitampul si Petrus copingna i, "Kuidah ngo kono i pekken Getsemane i, rebbak dekketSa!" **27** Nai idokken si Petrus mo, "Oda," -- janah tupung ibas katika i mèter takuak mo manuk. **28** Nai itaruhken kalak i mo Jesus njengkas kalohoon i bages si Kayafas nai mi bages gubèrnur si Latus. Ukum kalak Jahudi i sendiri, oda ngo masuk mi bages i, asa ulang tersubang kalak i lako mangan pangaan Paskah i. **29** Kerna naidi gabè karuar mo si Latus mendapetken kalak i, ikusoi mo kalak i, "Kadè pana pengaduun ndènè tersèngèt kalak ènda?" **30** Ialoi kalak i mo, "Oda kutaruhken kami Ia mendahi Gubèrnur i ukum oda lot salahNa." **31** Nai nina si Latus mo taba kalak idi, "Embah kènè mo Ia, janah hukum kènè Ia rembang mi agama ndènè!" Tapi ialoi kalak Jahudi imo, "Mengèkutken agama nami irarang ngo kami menghukum matè barang isè pè." **32** (Masa pè i, asa saut ngo nidokken Jesus tersèngètbakunè cara permatèna.) **33** Nai balik mo si Latus mi bagesna, janah iarahken mo Jesus, nai ikusoi mo Jesus, "Raja ngo Kono?" **34** Ialoi Jesus mo, "Turah i ukumu nai ngo kuso-kusomu i, barang tah sidèban ngo mendokken i taba Kono?" **35** Ialoi si Latus mo, "Kalak Jahudi ngo aku idah kono? Bangsamu dekket imam-imam ekuten ngo

pesakatken Kono taba Aku. Kadè pana ibahanken Kono?" **36** Nina Jesus mo, "Ukum kerajanKu idi, oda ngo bagè kerajaen dunia èn. Ukum i dunia èn nai kin ngo kerajanKu idi, tentu mengalo mo nemmu orangKu asa ulang ipesakat Aku mendahi kalak Jahudi. Tapi oda ngo i dunia èn nai kerajanKu i!" **37** Nai mengkuso mo si Latus, "Mula bagidi, tuhu ngo Kono Raja?" Ialoi Jesus mo, "Bagè nidokkenmu i ngo, Raja ngo aku. Asa tubuh aku janah roh mi dunia èn, pellin sada ngo kessa tujunku; imo lako mengkesaksiken tersèngèt kebennaren. Barang isè roh i sibennar idi nai, ijalo ngo peddahKu." **38** Nai ikusoi si Latus nola mo Jesus, "Kadè ngo kebennaren i?" Enggo kessa idokken si Latus bagidi, mi ruar mo ia mendahi kalak Jahudi, nina mo taba kalak i, "Kadè poda lot dapet aku salahNa. **39** Tapi bagè kecemmalen ndènè, dak kupaluah ngo sada kalak siterkurung tupung Ari Raya Paskah. Uè ngo kènè asa kupaluah raja kalak Jahudi bai ndènè?" **40** Ialoi kalak i mo ninganna isurakken, "Oda! Ulang paluah Ia! Si Barabas mo paluah lotiin!" (Ukum si Barabas i, pennamun ngo.)

**19:1** Nai iarahken si Latus mo Jesus, idokken mo asa iligasi kalak idi ia. **2** Idandani soridadu nisidi mo dori mahan bulang-bulang, nai ibaing kalak i mo bulang-bulang dori i mi babontakal Jesus. Enggo kessa i, isellukken kalak i mo tabaSa jubah meharbu. **3** Merrohen mo kalak i mendahi Jesus ninganna idokken, "Njuah-njuah mo bamu alè raja kalak Jahudi!" Enggo kessa idokken bagidi mèter iparapi kalak i mo Jesus. **4** Nai mi ruar nola mo si Latus sikali nai, nina mo taba jelma nterrem i, "Tengen kènè mo kuarahken Ia mi ruar, asa ibettoh kènè oda lot dapet aku salahNa." **5** Karuar mo Jesus ninganna memakè bulang-bulang dori i janah memakè jubah meharbu. Idokken si Latus mo taba kalak idi, "Tengen kènè mo kalakna!" **6** Idah imam-imam ekuten deket perjaga-perjaga idi kessa mo Jesus, isurakken kalak i mo, "Persilangken, Persilangken mo Ia!" Nai idokken si Latus mo, "Embah kènè mo Ia janah persilangken kènè, ai kadè poda lot dapet aku salahNa." **7** Ialoi kalak Jahudi mo, "Mengèkutken hukum nami, kennah merrutang kessah ngo Ia, ai idokken ngo diriNa Anak Dèbata." **8** Idengkoh si Latus kessa mo nidokken kalak idi i, makin mbiar

mo ia. **9** Ibengketti nola mo kantorna, janah ikusoi mo Jesus, "Idikè nai ngo Kono?" Tapi sip sambing ngo Jesus, oda ialoi barang kadè pè ikusoken. **10** Nai idokken si Latus mo mbannga, "Oda uè Kono mengaloi aku? Èngèt mo, merkuasa ngo aku paluahken Kono, janah merkuasa ma ngo aku mempersilangken Kono!" **11** Nai ialoi Jesus mo, "Ukum oda Iberrèken Dèbata kuasa i bamu, kadè poda lot kuasamu bangKu. Kerna naidi, belgahen ngo dosa sipesakatken Aku, dari pada kono." **12** Idengkoh si Latus kessa mo rana Jesus idi, makin itulasi mo dalan lako paluahken Jesus. Tapi muat nggangna mo isurak-surakken kalak Jahudi, "Mula ipaluah Kono Ia, oda dengan Kèsar i Kono. Ai barang isè mendokken dirina raja, musuh Kèsar i ngo ia!" **13** Idengkoh si Latus kessa mo kata-kata idi, iarahken mo Jesus mi ruar. Kundul mo ia mi kundulen perhukumen mergerar Karosi Batu. (Kata Heber gerarna Gabata.) **14** Tikanna idi kira-kira naing pukul sipuluh dua, ari perkebbasen mi Ari Raya Paskah. Idokken si Latus mo taba kalak idi, "Ènda ngo raja ndènè!" **15** Nai isurakken kalak i mo, "Bunuh mo Ia! Bunuh! Persilangken mo Ia!" Nai nina si Latus mo, "Irido kènè ngo kennah kupersilangken raja ndènè?" Ialoi imam-imam ekuten mo, "Oda lot raja nami laènken Kèsar i!" **16** Nai ipessoh si Latus mo Jesus taba kalak i, asa ipersilangken. Iarahken kalak i mo Jesus, laus i sidi nai. **17** Nai karuar mo Jesus, janah Ia sendiri ngo memersan kayu persilangNa i, lako laus mi bekkas mergerar "Bekkas Pertulanen". (Ukum i kata Heber igerari ngo Golgota.) **18** Isidi mo Ia ilabangken kalak i mi kayu persilang. Rebbak dekketSa lot dèng ma ngo dua kalak nai sidèbanna Ipersilangken; sada kalak kan kambirangna janah sada kalak nai kan kamuhunna. Ukum Jesus i tengah-tengah ngo. **19** I babo silang Jesus idi, isuratken si Latus ngo sada surat bagèen katana, "Jesus kalak Nazaret Raja Kalak Jahudi." **20** Mèduk ngo kalak Jahudi menjaka surat i, ai oda ndaoh bekkas Jesus ipersilangken idi i kuta nai. Isuratken ngo kata i, i kata Heber, kata Latin dekket kata Junani. **21** Nai idokken imam-imam ekuten kalak Jahudi mo taba si Latus, "Ulang surat Raja kalak Jahudi, 'tapi suratken mo: Idokken kalak ènda, Aku ngo Raja kalak Jahudi.'" **22** Tapi ialoi si Latus mo, "Sienggo tersurat idi, tersurat mo!" **23** Enggo kessa ipersilangken soridadu i Jesus, ibuat kalak i mo

olesNa, ibagi empat mo i, gennep terolih sada bagian. Ibuat kalak idi ma mo jubahNa. Ukum jubahNa i, oda ngo merpenjarumen -- itennun sambing ngo i terruh nai mi babo. **24** Nina soridadu i mo samahsa, "Ulang mo sigettap-gettap jubah i. Mertendung mo kita barang bai isè i." Masa pè bagidi, asa saut ngo nidokken Bibèl bagèen: "Ipella-pella kalak idi ngo olesKu. Mertendung ngo kalak i tersèngèt jubahKu." Janah tuhuna bagi ngo ibaing soridadu i. **25** I gembar kayu persilang Jesus i, cènder ngo inangNa, nangudaNa, si Maria sinibages si Kleopas dekket si Maria Magdalena. **26** Tikan idah Jesus kessa enggo isidi inangNa dekket sisiin kekellengen atèNa, nina mo taba inangNa i, "Nangè, tengen mo, idi mo anakmi." **27** Nai nina Jesus mo mbang sisinNa i, "Tengen mo: Idi ngo inangmi." Mulai isidi nai mo iarahken sisinNa i inang Jesus merrian mi bagesna. **28** Enggo kessa bagidi, ibettoh Jesus mo enggo pul karinana, asa saut bagè sittersurat ibas Bibèl, Idokken Jesus mo, "Muas Aku." **29** Lot mo isidi sada mangkuk dom anggur macem. Isernepken kalak idi mo lumut mi bagasen anggur macem i, nai idudurken kalak idi mo lumut i arap sada biski mi bibir Jesus. **30** Enggo kessa iènum Jesus anggur macem i, nina mo, "Enggo merujung!" Nai ipetungkuk mo takalna lako mennohken tendina, nai mpostep mo kessahNa. **31** Oda uè berkuasa kalak Jahudi dak tong kenna gantung bangkè kalak sienggo ipersilangken i ipas kayu silang tupung ari Sabat, kerna ari mbellen ngo ari Sabat i, kerna tikan ipersilangken i Jesus tupung ngo Ari Sinderrang madèng Sabat. Nai ipidoken kalak Jahudi mo taba si Latus asa ipenggelli nèhè kalak sittersilang i, janah ipesampur bangkèna i kayu silang i nai. **32** Laus mo soridadu i memenggelli lebbèen nèhè sidua kalak sirebbak ipersilangken rebbak dekket Jesus. **33** Tapi soh kessa mo kalak idi mendahi Jesus, idah kalak I mo enggo matè keppè Jesus. Jadi oda nèngè pella ipenggel kalak i nèhèNa. **34** Tapi ipantem sada kalak soridadu mo merkitè kujurna terruh rusuk silao Jesus; nai tiris mo laè merdengandaro i ugah Jesus i nai. **35** Kalak simengidah i sendiri ngo mennukutken i, asa percaya kènè, janah tuhu ngo nidokkenna i, ai ibettoh ngo mennukutken situhunna ngo ia. **36** Masa pè karina idi asa dapet ngo nidokken sittersurat ibas Bibèl, "Sada poda tulanna ipenggel." **37** Lot dèng ma ngo tersurat ibas Bibèl bagèen,

"Itengen kalak simemantemsa i ngo Ia." **38** Enggo kessa bagidi, roh mo si Josep kalak Arimatea mi hadeppen si Latus lako mengido bangkè Jesus. (Ukum si Josep ènda percaya ngo taba Jesus, tapi kumarna mbiar ia midah penguasa kalak Jahudi, oda ntarar ia percaya). Nai ipaduè si Latus mo ipesampur si Josep bangkè Jesus. **39** Si Nikodemus pè, imo siroh mendahi Jesus berngin-berngin, rebbakken ngo ia dekket si Josep. Lembah si Nikodemus ngo minak mur mersaor minak gaharu -- kira-kira tellupuluh kilo buèna. **40** Duana ngo kalak i pelliasken bangkè Jesus, ibaluti mo dekket kaèn kapan rebbak dekket minak baungkus i, rembang mi adat mengkubur kalak Jahudi. **41** I bekkas Jesus ipersilangken i, lot ngo sada pekken. Lot ngo sada kuburen rembaru i pekken i, makdèng nung terpakkè lako mengkubur simatè. **42** Kumarna ndessing ngo pendèban i, janah kumarna enggo naing dapet tikkina ari Sabat, gabè mi kuburen i mo ikuburken kalak idi bangkè Jesus.

**20:1** Njengkas kalohoon ari Minggunkenna idi, taridah bukbuk bettekken dèng, laus ngo si Maria Magdalena mi pendèban i. Soh kessa ia mi sidi, idah mo enggo mbuka kuburen i. **2** Nai lojang mo ia mendahi si Simon Petrus dekket sisiin kekellengen atè Jesus, nina mo taba kalak i, "Enggo ibuat dèba Tuhan i i pendèban nai, oda kubettoh barang mikè ibaing!" **3** Nai berkat mo si Petrus dekket sisiin sada kalak nai mendahi kuburen i. **4** Rebbak lojang ngo kalak i duana, tapi lebbèen ngo soh mi kuburen i sisiin sisada kalak nai asa si Petrus. **5** Itengen kessa mo mi bagasen kuburen i, idah mo kaèn kapan i isidi, tapi oda pella ibengketti kuburen i mi bagasen. **6** Soh ma mo si Petrus, mèter ibengketti mo mi bagasen kuburen idi, idah ma mo kaèn kapan i mergamparen, **7** tapi ukum kaèn pemalut takal Jesus, oda rebbak gampar dekket kaèn sidèbankenna i; jaè ngo bekkasna gampar, janah merserpih. **8** Nai ibengketti sisiin sisada nai ma mo kuburen i, imo sisiin perlebbè soh mi kuburen i. Idah ma mo karinana i, gabè percaya mo ia. **9** (Tapi soh mi katikana idi pè, laju dèng ngo oda iarti kalaki sittersurat ibas Bibèl, simendokken kennah balik nggelluh ngo ia i kemmatèen nai.) **10** Nai balik mo sisiin sidua kalak i mi kuta. **11** Ukum si Maria dak tong ngo ia i gembar kuburen i janah tangis. Ninganna ia tangis idi, itengen mo

mi bagasen pendèban idi, **12** nai lot mo idah dua kalak malaèkat merpakèen mbulan. Sada kundul kan julu meddem, sada kalak nai kan tellagahen. **13** Nai nina malaèkat-malaèkat i mo mbangsa, "Kasa tangis kono nangè?" Nai ialoi si Maria mo, "Ibuat simemmuat ngo Tuhanki, oda kubettoh tah mikè Ibaing!" **14** Enggo kessa idokken si Maria bagidi, tumulih mo ia mi podi gabè idah mo Jesus cènder isidi, tapi oda ngo itandai, Jesus ngo keppèken i. **15** Idokken Jesus mo tabasa, "Kasa tangis kono nangè? Isè itulusi kono?" Idokdok si Maria ngo penjaga pekken i ia, gabè nina mo mbangsa, "Mula kono ngo mengompatSa isènda nai, bagahken mo bangku idikè ia ibaing kono, asa kualengi." **16** Idokken Jesus mo tabasa, "Maria!" Nai itengen si Maria mo Jesus gabè nina mo i kata Heber: "Rabuni!" (Mendok, alè Guru.) **17** "Ulang dèng jamah Aku," nina Jesus, "Kerna madèng laus Aku mendahi Bapa. Laus mo kono mendahi anggingKu, bagahken mo taba kalak i: Laus mo Aku mendahi BapangKu janah Bapa ndènè, mendahi DèbatangKu janah Dèbata ndènè." **18** Nai laus mo si Maria Magdalena memagahken i taba sisiin Jesus magahken enggo idah ia Tuhan i, janah Tuhan i ngo mendokken i karina tabasa. **19** Enggo kessa gellap ari, i ari Minggu i dèng ma, merpulung mo sisiin Jesus i sada bages. Enggo mo igerruki pèntu bages i karina, kumarna mbiar ngo kalak i midah penguasa-penguasa Jahudi. Sintempu mèter roh mo Jesus janah cènder i tengah-tengah kalak i ninganna mendokken, "Damè mo bai ndènè!" **20** Enggo kessa idokken bagidi, Ipacidah mo tanganNa dekket rusuk silaona taba kalak i. Idah kalak i kessa mo Tuhan i, sondel mo sampang atè kalak i. **21** Nai iolihi Jesus nola mo mendokken sikali nai, "Damè mo bai ndènè. Tosè bagè ipasulak Bapa Aku, bagidi ma mo kènè Kupasulak." **22** Idokken kessa bagidi, Isempulken mo kessahNa bai kalak i ninganna idokken, "Jalo kènè mo Tendi Dèbata. **23** Mula isasa kènè dosa barang isè, enggo mo sasa i; janah mula ipehot kènè dosa barang isè, hot mo dosana i." **24** Ukum si Tomas sada kalak ipas sisiin Jesus sisipuluh dua kalak idi nai, oda kin ngo rebbak dekket sisiin sidèbankenna i, tikan roh i Jesus. **25** Nai isukutken sisiin i mo tabasa, "Enggo kuidah kami Tuhan i!" Tapi ialoi si Tomas mo kalak i, "Ukum oda kuidah pengellabangen i tanganNa i, janah ukum mak kucucukken jari-jaringku mi ugahna i, dekket

mi rusuk silaoNa i, oda percaya dèng aku." **26** Nai saminggu nai nola ma, merpulang mo sisiin Jesus i bages i, dekket mo si Tomas isidi. Karinana pèntu enggo igerruki. Tapi mèter roh mo Jesus cender i tengah-tengah kalak i mendokken, "Damè mo bai ndènè!" **27** Nai idokken Jesus mo taba si Tomas, "Baing mo jari-jarimu misèn, janah tengen mo tanganKu. Doroken mo tanganmu janah cucukken mo mi rusuk silaongKu, ulang ragu kono. Percaya mo kono!" **28** Nai mèter idokken si Tomas mo mbang Jesus, "Tuhanku janah Dèbatangku!" **29** Idokken Jesus mo tabasa, "Kumarna idah kono ngo Aku asa percaya kono? Sayurntua ngo sipercaya bangku, tukasi pè oda idah Aku!" **30** Matcam dèng ngo nemmu bagèna tanda-tanda sidèban ibaing Jesus, i hadeppen sisinNa i, tapi oda pella nisuratken idi ibas bukku èn. **31** Karinana sinisuratken isènda, ukum nitèmbakna imo asa percaya kènè, Jesus ngo Raja Sipaluah niperbagah-bagah Dèbata, imo Anak Dèbata, janah merkitè-kità percaya bana, gabè terrolih kenggelluhen mo kènè.

**21:1** Enggo kessa i ipacidah Jesus nola ma mo dirina sikali nai i biding Tao Tiberias. Bagèen ngo cara Jesus pacidahken dirina i: **2** Tikan sidari merpulang mo si Simon Petrus dekket si Tomas sinigerarena ma si Leppa; si Natanael anak kuta Kana si ni Galilea, dukak-dukak si Zebedeus dekket dua kalak nai sisiin Jesus sidèban. **3** Nai nina si Simon Petrus taba denganna i, "Laus aku lebbè menjala ikan." "Kami pè dekket ma mo," nina kalak i ma tabasa. Kebbas mo kalak i karina, janah ibengketti mo bungki lako berkat. Tapi suntuk bernginna idi kadè poda giam dapet kalak i. **4** Enggo kessa mendok mbincar mataniari, roh mo Jesus cènder i biding tao i; tapi oda itandai kalak i, Jesus ngo keppè i. **5** Idokken Jesus mo taba kalak i, "Lot ngo ikan ndènè alè pa?" "Oda lot," nina kalak i mengaloi. **6** Nai nina Jesus mo taba kalak i, "Sampakken kènè mo jala ndènè i mi kamuhun bungki i, asa kennaan kènè." Mènter isampakken kalak idi mo jalana i, nai gabè mak terruah kalak i nèngè jalana i kumarna mbuè ikan ibagasen jalana i. **7** Nai nina sisiin kekellengen atè Jesus mo mbang si Petrus, "Tuhan i ngo i," nai mèter iselluk si Petrus mo geddana (oda kin ngo ipakkè geddana), mèter mangkat mo ia mi laè i. **8** Sisiin sidèbankenna

i pè merbungki mo mi darat ninganna mengeruah jala sienggo dom ikan i, ai oda nèngè ndaoh kalak idi i darat nai, kira-kira seratus mèter nai ngo kessa. **9** Susur kessa mo kalak idi i bungki idi nai, idah kalak i mo enggo lot rara api i sidi janah ipanggang ikan i babona, bagidi ma dekket roti pè. **10** Idokken Jesus mo taba kalak i, "Embahkan kènè mo misèn dèba ikan sidapet kènè ndai." **11** Laus mo si Simon Petrus mi bungki, iruah mo jala i mi darat. Dom ngo ikan mbelgah-mbelgah i ibagasen bungki i, buèna seratus limapuluh tellu ngkabuah. Tukasi pè bagidi buè ikan idi, oda pella meribak jala i. **12** Nai nina Jesus mo taba kalak i, "Roh mo kènè mangan." Isè poda lot sisiin i mengkusoken, "Isè ngo kono?" Ai ibettoh kalak i ngo, Tuhan i ngo Ia. **13** Nai ijolmiti Jesus mo kalak i, ibuat mo roti i, ipemberrèken mo taba kalak i. Ikan i pè bagi ma ngo ibaing. **14** Èn mo petellu kaliken ipacidah Jesus dirina taba sisinNa, kessa nai balik nggelluh Ia i kemmatèen nai. **15** Enggo kessa salpun mangan kalak i, idokken Jesus mo taba si Simon Petrus, "O Simon, anak si Jona, nggkellengen ngo atèmu midah Aku asa kalak ènda?" "Uè, Tuhan, ibettoh kono ngo ngkelleng atèngku bamu," nina si Petrus mengaloi. Nai idokken Jesus mo tabasa, "Permakani mo biri-biringKu." **16** Pedua kaliken ikusoken Jesus mo bana, "O Simon anak si Jona, ngkelleng ngo atèmu midah Aku?" Ialoi si Somon Petrus mo, "Uè Tuhan, ibettoh kono ngo ngkelleng atèngku bamu." Nai idokken Jesus mo tabasa, "Permakani mo biri-biringKu." **17** Nai ikusoi Jesus nola dèng ma mo ia petellu kaliken, "O Simon anak si Jona, ngkelleng ngo atèmu midah Aku?" Gabè marsak mo si Petrus kumarna sanga tellu kali ikusoi Jesus ia. Nai ialoi si Petrus mo, "Tuhan, Tuhan, ibettoh kono ngo karinana: Ibettoh kono ma ngo ngkelleng atèngku bamu." Nai idokken Jesus mo taba si Petrus, "Permakani mo biri-biringKu. **18** Ntangkas mo Kudokken bamu; tikan poso dèng kono, kono ngo mengkokosi dirimu, janah lemmomu ngo barang dampak dikè kono laus. Tapi tua-tua kessa kono luas, idoroken kono mo tanganmu mpak sidèban, janah sidèban i mo mengèkèti kono, nai iembah mo kono mi bekkas siso nikellemmokenmu." **19** (Merkitè kata i, ibagahken Jesus ngo bakunè permatè si Petrus lako pesangapken Dèbata.) Enggo kessa bagidi, idokken Jesus dèng ma mo taba si Petrus, "Èkutken mo Aku!" **20** Tikan tumulih si

Petrus, idah mo i podina sisiin kekellengen atè Jesus. (Ia ngo sisiin kundul ndessing i gambar Jesus tikan mangan janah mengkuso taba Jesus, "Tuhan isè ngo naing menelbuh Kono?") **21** Idah si Petrus kessa mo sisiin i, ikusoi si Petrus mo Jesus, "Tuhan, bakunè ngo ia luas?" **22** Ialoi Jesus mo, "Mula pè Kupergeddo asa nggelluh ia soh mi pekirohKu luas, oda pella sarihenkenmu idi. Èkutken sambing mo Aku!" **23** Kemulihkenna idi, gabè sar mo berritana, bai samah-samah sisiin Jesus i, oda matè sisiin idi. Keppèken oda ngo lot idokken Jesus, oda matè sisiin i. Ukum nidokken Jesus imo: "Mula pè Kupergeddo asa tettag ia nggelluh soh mi ari pekkirohKu luas, asa oda pella sarihenkenmu idi!" **24** Sisiin idi ngo mengindangken tersèngèt karina simasa èn. Ia ma ngo simenuratken janah sibettoh ngo, bennar ngo sinidokkenna i. **25** Matcam dèng ngo nemmu bagèna sinibaing Jesus. Ukum isuratken karinana i, dokatèngku oda siat suberri dunia èn mahan bekkas bukku si nisurat idi.